

Romiyon

Salām

¹ Yih khat Masīh Īsā ke ḡhulām Paulus kī taraf se hai jise rasūl hone ke lie bulāyā aur Allāh kī k̄hushk̄habrī kī munādī karne ke lie alag kiyā gayā hai.

² Pāk nawishton meñ darj is k̄hushk̄habrī kā wādā Allāh ne pahle hī apne nabiyon se kar rakhā thā. ³ Aur yih paighām us ke Farzand Īsā ke bāre meñ hai. Insānī lihāz se wuh Dāūd kī nasl se paidā huā, ⁴ jabki Rūhul-quds ke lihāz se wuh qudrat ke sāth Allāh kā Farzand ṭhahrā jab wuh murdon meñ se jī uṭhā. Yih hai hamāre K̄hudāwand Īsā Masīh ke bāre meñ Allāh kī k̄hushk̄habrī. ⁵ Masīh se hameñ rasūlī ikhtiyār kā yih fazl hāsil huā hai ki ham tamām Ḡhairyahūdiyon meñ munādī karen tāki wuh imān lā kar us ke tābe ho jāen aur yon Masīh ke nām ko jalāl mile. ⁶ Āp bhī un Ḡhairyahūdiyon meñ se haiñ, jo Īsā Masīh ke bulāe hue haiñ.

⁷ Maiñ āp sab ko likh rahā hūñ jo Rom meñ Allāh ke pyāre haiñ aur maḡhsūs-o-muqaddas hone ke lie bulāe gae haiñ.

K̄hudā hamārā Bāp aur K̄hudāwand Īsā Masīh āp ko fazl aur salāmatī atā karen.

Rom Jāne kī Ārzū

⁸ Awwal, maiñ āp sab ke lie Īsā Masīh ke wasīle se apne K̄hudā kā shukr kartā hūñ, kyonki pūrī

duniyā meñ āp ke īmān kā charchā ho rahā hai. ⁹ Ḳhudā hī merā gawāh hai jis kī ḳhidmat main apnī rūh meñ kartā hūn jab main us ke Farzand ke bāre meñ ḳhushḳhabrī phailātā hūn, main lagātār āp ko yād kartā rahtā hūn ¹⁰ aur har waqt apnī duāon meñ minnat kartā hūn ki Allāh mujhe āḳhirkār āp ke pās āne kī kāmyābī atā kare. ¹¹ Kyoñki main āp se milne kā ārzūmand hūn. Main chāhtā hūn ki mere zariye āp ko kuchh ruhānī barkat mil jāe aur yon āp mazbūt ho jāen. ¹² Yānī āne kā maqsad yih hai ki mere īmān se āp kī hauslā-afzāī kī jāe aur isī tarah āp ke īmān se merā hauslā bhī barh jāe.

¹³ Bhāiyo, āp ke ilm meñ ho ki main ne bahut dafā āp ke pās āne kā irādā kiyā. Kyoñki jis tarah dīgar Ḡhairyahūdī aqwām meñ merī ḳhidmat se phal paidā huā hai usī tarah āp meñ bhī phal deḳhnā chāhtā hūn. Lekin āj tak mujhe rokā gayā hai. ¹⁴ Bāt yih hai ki yih ḳhidmat saranjām denā merā farz hai, ḳhāh Yūnāniyon meñ ho yā Ḡhairyūnāniyon meñ, ḳhāh dānāon meñ ho yā nādānāon meñ. ¹⁵ Yihī wajah hai ki main āp ko bhī jo Rom meñ rahte haiñ Allāh kī ḳhushḳhabrī sunāne kā mushtāq hūn.

Allāh kī Ḳhushḳhabrī kī Quḍrat

¹⁶ Main to ḳhushḳhabrī ke sabab se sharmātā nahīn, kyoñki yih Allāh kī quḍrat hai jo har ek ko jo īmān lātā hai najāt detī hai, pahle Yahūdiyon ko, phir Ḡhairyahūdīyon ko. ¹⁷ Kyoñki is ḳhushḳhabrī meñ Allāh kī hī rāstbāzī zāhir hotī hai, wuh rāstbāzī jo shurū se āḳhir tak īmān par mabnī hai. Yihī bāt kalām-e-muqaddas meñ

darj hai jab likhā hai, “Rāstbāz īmān hī se jītā rahegā.”

Insān par Allāh kā Ġhazab

¹⁸ Lekin Allāh kā ġhazab āsmān par se un tamām bedīn aur nārāst logoñ par nāzil hotā hai jo sachchāī ko apnī nārāstī se dabāe rakhte haiñ. ¹⁹ Jo kuchh Allāh ke bāre meñ mālūm ho saktā hai wuh to un par zāhir hai, hāñ Allāh ne khud yih un par zāhir kiyā hai. ²⁰ Kyoñki duniyā kī takhlīq se le kar āj tak insān Allāh kī andekhī fitrat yānī us kī azlī qudrat aur ulūhiyat maḡhlūqāt kā mushāhadā karne se pahchān saktā hai. Is lie un ke pās koī uzr nahīñ. ²¹ Allāh ko jānane ke bāwujūd unhoñ ne use wuh jalāl na diyā jo us kā haq hai, na us kā shukr adā kiyā balki wuh bātil ḡhayālāt meñ paḡ gae aur un ke besamajh diloñ par tārīkī chhā gai. ²² Wuh dāwā to karte the ki ham dānā haiñ, lekin ahmaq sābit hue. ²³ Yoñ unhoñ ne ġhairfānī Ḳhudā ko jalāl dene ke bajāe aise butoñ kī pūjā kī jo fānī insān, parindoñ, chaupāiyon aur reñgne wāle jānwaroñ kī sūrat meñ banāe gae the.

²⁴ Is lie Allāh ne unheñ un najis kāmoñ meñ chhoḡ diyā jo un ke dil karnā chāhte the. Natīje meñ un ke jism ek dūsre se behurmat hote rahe. ²⁵ Hāñ, unhoñ ne Allāh ke bāre meñ sachchāī ko radd karke jhūṡ ko apnā liyā aur maḡhlūqāt kī parastish aur ḡhidmat kī, na ki Ḳhālīq kī, jis kī tārīf abad tak hotī rahe, āmīn.

²⁶ Yihī wajah hai ki Allāh ne unheñ un kī sharmnāk shahwatoñ meñ chhoḡ diyā. Un kī ḡhawātīn ne fitratī jinsī tālluqāt ke bajāe

ghairfitrati tālluqāt rakhe. ²⁷ Isī tarah mard khawātīn ke sāth fitratī tālluqāt chhoṛ kar ek dūsre kī shahwat meñ mast ho gae. Mardoñ ne mardoñ ke sāth behayā harkateñ karke apne badanoñ meñ apnī is gumrahī kā munāsib badlā pāyā.

²⁸ Aur chūñki unhoñ ne Allāh ko jānane se inkār kar diyā is lie us ne unheñ un kī makrūh soch meñ chhoṛ diyā. Aur is lie wuh aisī harkateñ karte rahte haiñ jo kabhī nahīñ karnī chāhieñ. ²⁹ Wuh har tarah kī nārāstī, shar, lālach aur burāī se bhare hue haiñ. Wuh hasad, khūnrezī, jhagare, fareb aur kināwarī se labrez haiñ. Wuh chughlī khāne wāle, ³⁰ tohmat lagāne wāle, Allāh se nafrat karne wāle, sarkash, maḡhrūr, shekhībāz, badī ko ijād karne wāle, māñ-bāp ke nāfarmān, ³¹ besamajh, bewafā, sangdil aur berahm haiñ. ³² Agarche wuh Allāh kā farmān jānte haiñ ki aisā karne wāle sazā-e-maut ke mustahiq haiñ to bhī wuh aisā karte haiñ. Na sirf yih balki wuh aisā karne wāle dīgar logoñ ko shābāsh bhī dete haiñ.

2

Allāh kī Rāst Adālat

¹ Ai insān, kyā tū dūsroñ ko mujrim ṭhahrātā hai? Tū jo koī bhī ho terā koī uzr nahīñ. Kyoñki tū khud bhī wuhī kuchh kartā hai jis meñ tū dūsroñ ko mujrim ṭhahrātā hai aur yoñ apne ap ko bhī mujrim qarār detā hai. ² Ab ham jānte haiñ ki aise kām karne wāloñ par Allāh kā faislā munsifānā hai. ³ Tāham tū wuhī kuchh kartā hai jis meñ tū dūsroñ ko mujrim ṭhahrātā hai.

Kyā tū samajhtā hai ki ḡhud Allāh kī adālat se bach jāegā? ⁴ Yā kyā tū us kī wasī mehrbānī, tahammul aur sabar ko haqīr jāntā hai? Kyā tujhe mālūm nahīn ki Allāh kī mehrbānī tujhe taubā tak le jānā chāhtī hai? ⁵ Lekin tū haṭdharm hai, tū taubā karne ke lie taiyār nahīn aur yoñ apnī sazā meñ izāfā kartā jā rahā hai, wuh sazā jo us din dī jāegī jab Allāh kā ḡhazab nāzil hogā, jab us kī rāst adālat zāhir hogī. ⁶ Allāh har ek ko us ke kāmoñ kā badlā degā. ⁷ Kuchh log sābitqadmī se nek kām karte aur jalāl, izzat aur baqā ke tālib rahte haiñ. Unheñ Allāh abadī zindagī atā karegā. ⁸ Lekin kuchh log ḡhudḡharz haiñ aur sachchāī kī nahīn balki nārāstī kī pairawī karte haiñ. Un par Allāh kā ḡhazab aur qahr nāzil hogā. ⁹ Musibat aur pareshānī har us insān par āegī jo burāī kartā hai, pahle Yahūdī par, phir Yūnānī par. ¹⁰ Lekin jalāl, izzat aur salāmatī har us insān ko hāsil hogī jo nekī kartā hai, pahle Yahūdī ko, phir Yūnānī ko. ¹¹ Kyoñki Allāh kisī kā bhī tarafdār nahīn.

¹² ḡhairyahūdiyoñ ke pās Mūsūwī shariyat nahīn hai, is lie wuh shariyat ke baḡhair hī gunāh karke halāk ho jāte haiñ. Yahūdiyoñ ke pās shariyat hai, lekin wuh bhī nahīn bacheñge. Kyoñki jab wuh gunāh karte haiñ to shariyat hī unheñ mujrim ṭhahrātī hai. ¹³ Kyoñki Allāh ke nazdīk yih kāfī nahīn ki ham shariyat kī bāteñ suneñ balki wuh hameñ us waqt hī rāstbāz qarār detā hai jab shariyat par amal bhī karte haiñ. ¹⁴ Aur go ḡhairyahūdiyoñ ke pās shariyat nahīn hotī lekin jab bhī wuh fitratī taur par wuh kuchh karte haiñ jo shariyat farmātī hai to zāhir karte

haiñ ki go hamāre pās shariyat nahīn to bhī ham apne āp ke lie khud shariyat haiñ. ¹⁵ Is meñ wuh sābit karte haiñ ki shariyat ke taqāze un ke dil par likhe hue haiñ. Un kā zamīr bhī is kī gawāhī detā hai, kyonki un ke khayālāt kabhī ek dūsre kī mazammat aur kabhī ek dūsre kā difā bhī karte haiñ. ¹⁶ Gharz, merī khushkhabrī ke mutābiq har ek ko us din apnā ajr milegā jab Allāh Īsā Masih kī mārifat insānoñ kī poshidā bātoñ kī adālat karegā.

Yahūdī aur Shariyat

¹⁷ Achchhā, tū apne āp ko Yahūdī kahtā hai. Tū shariyat par inhisar kartā aur Allāh ke sāth apne tālluq par faḡhr kartā hai. ¹⁸ Tū us kī marzī ko jāntā hai aur shariyat kī tālīm pāne ke bāis sahīh rāh kī pahchān rakhtā hai. ¹⁹ Tujhe pūrā yaqīn hai, ‘Main andhoñ kā qāyd, tārikī meñ basne wāloñ kī raushnī, ²⁰ besamjhoñ kā muallim aur bachchoñ kā ustād hūñ.’ Ek lihāz se yih durust bhī hai, kyonki shariyat kī sūrat meñ tere pās ilm-o-irfān aur sachchāi maujūd hai. ²¹ Ab batā, tū jo auroñ ko sikhātā hai apne āp ko kyon nahīn sikhātā? Tū jo chorī na karne kī munādī kartā hai, khud chorī kyon kartā hai? ²² Tū jo auroñ ko zinā karne se manā kartā hai, khud zinā kyon kartā hai? Tū jo butoñ se ghin khātā hai, khud mandiroñ ko kyon lūṭtā hai? ²³ Tū jo shariyat par faḡhr kartā hai, kyon is kī khilāfwarzī karke Allāh kī be'izzatī kartā hai? ²⁴ Yih wuhī bāt hai jo kalām-e-muqaddas meñ likhī hai, “Tumhāre sabab se Ghairyahūdiyoñ meñ Allāh ke nām par kufr bakā jātā hai.”

25 Khatne kā fāydā to us waqt hotā hai jab tū sharīat par amal kartā hai. Lekin agar tū us kī hukmadūlī kartā hai to tū nāmaḳhtūn jaisā hai. 26 Is ke baraks agar nāmaḳhtūn Ġhairyahūdī sharīat ke taqāzoñ ko pūrā kartā hai to kyā Allāh use maḳhtūn Yahūdī ke barābar nahīn ṭhahrāegā? 27 Chunānche jo nāmaḳhtūn Ġhairyahūdī sharīat par amal karte haiñ wuh āp Yahūdīyon ko mujrim ṭhahrāeñge jin kā khatnā huā hai aur jin ke pās sharīat hai, kyonki āp sharīat par amal nahīn karte. 28 Āp is binā par haqīqī Yahūdī nahīn haiñ ki āp ke wālidain Yahūdī the yā āp ke badan kā khatnā zāhirī taur par huā hai. 29 Balki haqīqī Yahūdī wuh hai jo bātin meñ Yahūdī hai. Aur haqīqī khatnā us waqt hotā hai jab dil kā khatnā huā hai. Aisā khatnā sharīat se nahīn balki Rūhul-quds ke wasile se kiyā jātā hai. Aur aise Yahūdī ko insān kī taraf se nahīn balki Allāh kī taraf se tārif miltī hai.

3

1 To kyā Yahūdī hone kā yā khatnā kā koī fāydā hai? 2 Jī hāñ, har tarah kā! Awwal to yih ki Allāh kā kalām un ke sapurd kiyā gayā hai. 3 Agar un meñ se bāz bewafā nikle to kyā huā? Kyā is se Allāh kī wafādārī bhī khatm ho jāegī? 4 Kabhī nahīn! Lāzim hai ki Allāh sachchā ṭhahre go har insān jhūṭā hai. Yoñ kalām-e-muqaddas meñ likhā hai, “Lāzim hai ki tū bolte waqt rāst ṭhahre aur adālat karte waqt ḡhālib āe.”

5 Koī kah saktā hai, “Hamārī nārāstī kā ek achchhā maqsad hotā hai, kyonki is se logoñ par

Allāh kī rāstī zāhir hotī hai. To kyā Allāh be'insāf nahīn hogā agar wuh apnā ḡhazab ham par nāzil kare?” (Main insānī ḡhayāl pesh kar rahā hūn.)

⁶ Hargiz nahīn! Agar Allāh rāst na hotā to phir wuh duniyā kī adālat kis tarah kar saktā?

⁷ Shāyad koī aur etarāz kare, “Agar merā jhūṭ Allāh kī sachchāī ko kasrat se numāyān kartā hai aur yoñ us kā jalāl baḡhtā hai to wuh mujhe kyoñkar gunāhgār qarār de saktā hai?” ⁸ Kuchh log ham par yih kufr bhī bakte haiñ ki ham kahte haiñ, “Āo, ham burāī karen tāki bhalāī nikle.” Insāf kā taqāzā hai ki aise logoñ ko mujrim ṡhahrāyā jāe.

Koī Rāstbāz Nahīn

⁹ Ab ham kyā kaheñ? Kyā ham Yahūdī dūsron se bartar haiñ? Bilkul nahīn. Ham to pahle hī yih ilzām lagā chuke haiñ ki Yahūdī aur Yūnānī sab hī gunāh ke qabze meñ haiñ. ¹⁰ Kalām-e-muqaddas meñ yoñ likhā hai,

“Koī nahīn jo rāstbāz hai, ek bhī nahīn.

¹¹ Koī nahīn jo samajhdār hai,
koī nahīn jo Allāh kā tālib hai.

¹² Afsos, sab sahīh rāh se bhaṡak gae.

Sab ke sab bigaṡ gae haiñ.

Koī nahīn jo bhalāī kartā ho, ek bhī nahīn.

¹³ Un kā galā khulī qabr hai,

un kī zabān fareb detī hai.

Un ke hoñṡoñ meñ sāñp kā zahr hai.

¹⁴ Un kā muñh lānat aur karwāhaṡ se bharā hai.

¹⁵ Un ke pāñw ḡhūn bahāne ke lie jaldī karte haiñ.

16 Apne pīchhe wuh tabāhī-o-barbādī chhoṛ jāte haiñ,

17 aur wuh salāmatī kī rāh nahīñ jānte.

18 Un kī ānkhoñ ke sāmne Ḳhudā kā ḳhauf nahīñ hotā.”

19 Ab ham jānte haiñ ki sharīat jo kuchh farmātī hai unheñ farmātī hai jin ke sapurd wuh kī gāi hai. Maqsad yih hai ki har insān ke bahāne ḳhatm kie jāeñ aur tamām duniyā Allāh ke sāmne mujrim ṭhahre. 20 Kyoñki sharīat ke taqāze pūre karne se koī bhī us ke sāmne rāstbāz nahīñ ṭhahar saktā, balki sharīat kā kām yih hai ki hamāre andar gunāhgār hone kā ehsās paidā kare.

Rāstbāz Hone ke lie Īmān Zarūrī Hai

21 Lekin ab Allāh ne ham par ek rāh kā inkishāf kiyā hai jis se ham sharīat ke baḡhair hī us ke sāmne rāstbāz ṭhahar sakte haiñ. Tauret aur nabiyon ke sahīfe bhī is kī tasdiq karte haiñ.

22 Rāh yih hai ki jab ham Īsā Masīh par Īmān lāte haiñ to Allāh hameñ rāstbāz qarār detā hai. Aur yih rāh sab ke lie hai. Kyoñki koī bhī farq nahīñ,

23 sab ne gunāh kiyā, sab Allāh ke us jalāl se mahrūm haiñ jis kā wuh taqāzā kartā hai, 24 aur sab muft meñ Allāh ke fazl hī se rāstbāz ṭhahrāe jāte haiñ, us fidie ke wasīle se jo Masīh Īsā ne diyā. 25 Kyoñki Allāh ne Īsā ko us ke ḳhūn ke bāis kaffārā kā wasīlā banā kar pesh kiyā, aisā kaffārā jis se Īmān lāne wāloñ ko gunāhoñ kī muāfi miltī hai. Yoñ Allāh ne apnī rāstī zāhir kī, pahle māzī meñ jab wuh apne sabr-o-tahammul meñ gunāhoñ kī sazā dene se bāz rahā 26 aur

ab maujūdā zamāne meñ bhī. Is se wuh zāhir kartā hai ki wuh rāst hai aur har ek ko rāstbāz ṭhahrātā hai jo Isā par īmān lāyā hai.

²⁷ Ab hamārā faḥr kahān rahā? Use to ḵhatm kar diyā gayā hai. Kis shariyat se? Kyā āmāl kī shariyat se? Nahīn, balki īmān kī shariyat se. ²⁸ Kyonki ham kahte haiñ ki insān ko īmān se rāstbāz ṭhahrāyā jātā hai, na ki āmāl se. ²⁹ Kyā Allāh sirf Yahūdiyōñ kā Ḳhudā hai? Ḡhairyahūdiyōñ kā nahīn? Hāñ, Ḡhairyahūdiyōñ kā bhī hai. ³⁰ Kyonki Allāh ek hī hai jo maḵtūn aur nāmaḵtūn donoñ ko īmān hī se rāstbāz ṭhahrāegā. ³¹ Phir kyā ham shariyat ko īmān se mansūḵh karte haiñ? Hargiz nahīn, balki ham shariyat ko qāym rakhte haiñ.

4

Ibrāhīm Īmān se Rāstbāz Ṭhahrā

¹ Ibrāhīm jismānī lihāz se hamārā bāp thā. To rāstbāz ṭhaharne ke silsile meñ us kā kyā tajrabā thā? ² Ham kah sakte haiñ ki agar wuh shariyat par amal karne se rāstbāz ṭhahartā to wuh apne āp par faḥr kar saktā thā. Lekin Allāh ke nazdīk us ke pās apne āp par faḥr karne kā koī sabab na thā. ³ Kyonki kalām-e-muqaddas meñ likhā hai, “Ibrāhīm ne Allāh par bharosā rakhā. Is binā par Allāh ne use rāstbāz qarār diyā.” ⁴ Jab log kām karte haiñ to un kī mazdūrī koī ḵhās mehrbānī qarār nahīn dī jātī, balki yih to un kā haq bantā hai. ⁵ Lekin jab log kām nahīn karte balki Allāh par īmān rakhte haiñ jo bedīnoñ ko rāstbāz qarār detā hai to un kā koī haq nahīn

bantā. Wuh un ke imān hī kī binā par rāstbāz qarār die jāte haiñ. ⁶ Dāūd yihī bāt bayān kartā hai jab wuh us shaḳhs ko mubāarak kahtā hai jise Allāh baḡhair āmāl ke rāstbāz ṭhahrātā hai,

⁷ “Mubāarak haiñ wuh jin ke jarāym muāf kie gae.

Jin ke gunāh ḡhānpe gae haiñ.

⁸ Mubāarak hai wuh jis kā gunāh Rab hisāb meñ nahīñ lāegā.”

⁹ Kyā yih mubāarakbādī sirf maḳhtūnoñ ke lie hai yā nāmaḳhtūnoñ ke lie bhī? Ham to bayān kar chuke haiñ ki Ibrāhīm imān kī binā par rāstbāz ṭhahrā. ¹⁰ Use kis hālat meñ rāstbāz ṭhahrāyā gayā? Ḳhatnā karāne ke bād yā pahle? Ḳhatne ke bād nahīñ balki pahle. ¹¹ Aur ḳhatnā kā jo nishān use milā wuh us kī rāstbāzī kī muhr thī, wuh rāstbāzī jo use ḳhatnā karāne se peshtar milī, us waqt jab wuh imān lāyā. Yoñ wuh un sab kā bāp hai jo baḡhair ḳhatnā karāe imān lāe haiñ aur is binā par rāstbāz ṭhaharte haiñ. ¹² Sāth hī wuh ḳhatnā karāne wāloñ kā bāp bhī hai, lekin un kā jin kā na sirf ḳhatnā huā hai balki jo hamāre bāp Ibrāhīm ke us imān ke naqsh-e-qadam par chalte haiñ jo wuh ḳhatnā karāne se peshtar rakhtā thā.

Allāh kā Wādā Imān se Hāsil Hotā Hai

¹³ Jab Allāh ne Ibrāhīm aur us kī aulād se wādā kiyā ki wuh duniyā kā wāris hogā to us ne yih is lie nahīñ kiyā ki Ibrāhīm ne shariāt kī pairawī kī balki is lie ki wuh imān lāyā aur yoñ rāstbāz ṭhahrāyā gayā. ¹⁴ Kyoñki agar wuh wāris haiñ jo shariāt ke pairokār haiñ to phir imān beasar

ṭhahrā aur Allāh kā wādā miṭ gayā. ¹⁵ Sharīat Allāh kā ḡhazab hī paidā kartī hai. Lekin jahān koī shariyat nahīn wahān us kī ḡhilāfwarzī bhī nahīn.

¹⁶ Chunānche yih mīrās īmān se miltī hai tāki is kī buniyād Allāh kā fazl ho aur is kā wādā Ibrāhīm kī tamām nasl ke lie ho, na sirf shariyat ke pairokāron ke lie balki un ke lie bhī jo Ibrāhīm kā-sā īmān rakhte haiñ. Yihī ham sab kā bāp hai. ¹⁷ Yon Allāh kalām-e-muḡaddas meñ us se wādā kartā hai, “Maiñ ne tujhe bahut ḡaumoñ kā bāp banā diyā hai.” Allāh hī ke nazdik Ibrāhīm ham sab kā bāp hai. Kyoñki us kā īmān us Ḳhudā par thā jo murdoñ ko zindā kartā aur jis ke hukm par wuh kuchh paidā hotā hai jo pahle nahīn thā. ¹⁸ Ummīd kī koī kiran dikhāi nahīn detī thī, phir bhī Ibrāhīm ummīd ke sāth īmān rakhtā rahā ki maiñ zarūr bahut ḡaumoñ kā bāp banūngā. Aur āḡhirkār aisā hī huā, jaisā kalām-e-muḡaddas meñ wādā kiyā gayā thā ki “Terī aulād itnī hī beshumār hogī.” ¹⁹ Aur Ibrāhīm kā īmān kamzor na paṛā, hālānki use mālūm thā ki maiñ taḡrīban sau sāl kā hūn aur merā aur Sārā ke badan goyā murdā haiñ, ab bachche paidā karne kī umr Sārā ke lie guzar chukī hai. ²⁰ To bhī Ibrāhīm kā īmān ḡhatm na huā, na us ne Allāh ke wāde par shāḡ kiyā balki īmān meñ wuh mazīd mazbūt huā aur Allāh ko jalāl detā rahā. ²¹ Use puḡhtā yaḡīn thā ki Allāh apne wāde ko pūrā karne kī ḡudrat rakhtā hai. ²² Us ke is īmān kī wajah se Allāh ne use rāstbāz ḡarār diyā. ²³ Kalām-e-muḡaddas meñ yih bāt ki Allāh ne use rāstbāz ḡarār diyā na sirf us kī ḡhātir

likhī gaī ²⁴ balki hamārī k̄hātir bhī. Kyoṅki Allāh hamēñ bhī rāstbāz qarār degā agar ham us par īmān rakheñ jis ne hamāre K̄hudāwand Īsā ko murdoñ meñ se zindā kiyā. ²⁵ Hamārī hī k̄hatāoñ kī wajah se use maut ke hawāle kiyā gayā, aur hamēñ hī rāstbāz qarār dene ke lie use zindā kiyā gayā.

5

Rāstbāzī kā Anjām

¹ Ab chūñki hamēñ īmān se rāstbāz qarār diyā gayā hai is lie Allāh ke sāth hamārī sulah hai. Is sulah kā wasilā hamārā K̄hudāwand Īsā Masīh hai. ² Hamāre īmān lāne par us ne hamēñ fazl ke us maqām tak pahuñchāyā jahāñ ham āj qāym haiñ. Aur yoñ ham is ummīd par faḡhr karte haiñ ki ham Allāh ke jalāl meñ sharīk hoñge. ³ Na sirf yih balki ham us waqt bhī faḡhr karte haiñ jab ham musībatoñ meñ phañse hote haiñ. Kyoṅki ham jānte haiñ ki musībat se sābitqadmī paidā hotī hai, ⁴ sābitqadmī se puḡhtagī aur puḡhtagī se ummīd. ⁵ Aur ummīd hamēñ sharmīndā hone nahīñ detī, kyoṅki Allāh ne hamēñ Rūhul-quds de kar us ke wasile se hamāre diloñ meñ apnī muhabbat unḡelī hai.

⁶ Kyoṅki ham abhī kamzor hī the to Masīh ne ham bedīnoñ kī k̄hātir apnī jān de dī. ⁷ Mushkil se hī koī kisī rāstbāz kī k̄hātir apnī jān degā. Hāñ, mumkin hai ki koī kisī nekoḡār ke lie apnī jān dene kī jurrat kare. ⁸ Lekin Allāh ne ham se apnī muhabbat kā izhār yoñ kiyā ki Masīh ne us waqt hamārī k̄hātir apnī jān dī jab ham

gunāhgār hī the. ⁹ Hameñ Masīh ke ḳhūn se rāstbāz ṭhahrāyā gayā hai. To yih bāt kitnī yaqīnī hai ki ham us ke wasīle se Allāh ke ḡhazab se bacheṅge. ¹⁰ Ham abhī Allāh ke dushman hī the jab us ke Farzand kī maut ke wasīle se hamārī us ke sāth sulah ho gaī. To phir yih bāt kitnī yaqīnī hai ki ham us kī zindagī ke wasīle se najāt bhī pāeṅge. ¹¹ Na sirf yih balki ab ham Allāh par faḳhr karte haiñ aur yih hamāre Ḳhudāwand Īsā Masīh ke wasīle se hai, jis ne hamārī sulah karāī hai.

Ādam aur Masīh

¹² Jab Ādam ne gunāh kiyā to us ek hī shaḳhs se gunāh duniyā meñ āyā. Is gunāh ke sāth sāth maut bhī ā kar sab ādmiyon meñ phail gai, kyonki sab ne gunāh kiyā. ¹³ Sharīat ke inkishāf se pahle gunāh to duniyā meñ thā, lekin jahān sharīat nahīn hotī wahān gunāh kā hisāb nahīn kiyā jātā. ¹⁴ Tāham Ādam se le kar Mūsā tak maut kī hukūmat jāri rahī, un par bhī jinhoñ ne Ādam kī-sī hukmadūlī na kī.

Ab Ādam āne wāle Īsā Masīh kī taraf ishārā thā. ¹⁵ Lekin in donoñ meñ baṛā farq hai. Jo nemat Allāh muft meñ detā hai wuh Ādam ke gunāh se mutābiqat nahīn rakhtī. Kyonki is ek shaḳhs Ādam kī ḳhilāfwarzī se bahut-se log maut kī zad meñ ā gae. Lekin Allāh kā fazl kahīn zyādā muassir hai, wuh muft nemat jo bahutoñ ko us ek shaḳhs Īsā Masīh meñ milī hai. ¹⁶ Hāñ, Allāh kī is nemat aur Ādam ke gunāh meñ bahut farq hai. Us ek shaḳhs Ādam ke gunāh ke natīje meñ hameñ to mujrim qarār diyā gayā, lekin

Allāh kī muft nemat kā asar yih hai ki hameñ rāstbāz qarār diyā jātā hai, go ham se beshumār gunāh sarzad hue haiñ. ¹⁷ Is ek shaḳhs Ādam ke gunāh ke natīje meñ maut sab par hukūmat karne lagī. Lekin is ek shaḳhs Īsā Masīh kā kām kitnā zyādā muassir thā. Jitne bhī Allāh kā wāfir fazl aur rāstbāzī kī nemat pāte haiñ wuh Masīh ke wasīle se abadī zindagī meñ hukūmat kareñge.

¹⁸ Chunāñche jis tarah ek hī shaḳhs ke gunāh ke bāis sab log mujrim ṭhahre usī tarah ek hī shaḳhs ke rāst amal se wuh darwāzā khul gayā jis meñ dāḳhil ho kar sab log rāstbāz ṭhahar sakte aur zindagī pā sakte haiñ. ¹⁹ Jis tarah ek hī shaḳhs kī nāfarmānī se bahut-se log gunāhgār ban gae. Usī tarah ek hī shaḳhs kī farmānbardārī se bahut-se log rāstbāz ban jāeñge.

²⁰ Sharīat is lie darmiyān meñ ā gaī ki ḳhilāfwarzī baḥ jāe. Lekin jahān gunāh zyādā huā wahān Allāh kā fazl is se bhī zyādā ho gayā. ²¹ Chunāñche jis tarah gunāh maut kī sūrat meñ hukūmat kartā thā usī tarah ab Allāh kā fazl hameñ rāstbāz ṭhahrā kar hukūmat kartā hai. Yoñ hameñ apne Ḳhudāwand Īsā Masīh kī badaulat abadī zindagī hāsil hotī hai.

6

Masīh meñ Nāi Zindagī

¹ Kyā is kā matlab yih hai ki ham gunāh karte raheñ tāki Allāh ke fazl meñ izāfā ho? ² Hargiz nahīn! Ham to mar kar gunāh se lātālluḳ ho gae

haiñ. To phir ham kis tarah gunāh ko apne āp par hukūmat karne de sakte haiñ? ³ Yā kyā āp ko mālūm nahīn ki ham sab jinheñ baptismā diyā gayā hai is se Masīh Īsā kī maut meñ shāmil ho gae haiñ? ⁴ Kyoñki baptisme se hameñ dafnāyā gayā aur us kī maut meñ shāmil kiyā gayā tāki ham Masīh kī tarah naī zindagī guzāreñ, jise Bāp kī jalālī qudrat ne murdoñ meñ se zindā kiyā.

⁵ Chūñki is tarah ham us kī maut meñ us ke sāth paiwast ho gae haiñ is lie ham us ke jī uṭhne meñ bhī us ke sāth paiwast hoñge. ⁶ Kyoñki ham jānte haiñ ki hamārā purānā insān Masīh ke sāth maslūb ho gayā tāki gunāh ke qabze meñ yih jism nest ho jāe aur yoñ ham gunāh ke ghulām na raheñ. ⁷ Kyoñki jo mar gayā wuh gunāh se āzād ho gayā hai. ⁸ Aur hamārā imān hai ki chūñki ham Masīh ke sāth mar gae haiñ is lie ham us ke sāth zindā bhī hoñge, ⁹ kyoñki ham jānte haiñ ki Masīh murdoñ meñ se jī uṭhā hai aur ab kabhī nahīn maregā. Ab maut kā us par koī iḡhtiyār nahīn. ¹⁰ Marte waqt wuh hameshā ke lie gunāh kī hukūmat se nikal gayā, aur ab jab wuh dubārā zindā hai to us kī zindagī Allāh ke lie maḡhsūs hai. ¹¹ Āp bhī apne āp ko aisā samjheñ. Āp bhī mar kar gunāh kī hukūmat se nikal gae haiñ aur ab āp kī Masīh meñ zindagī Allāh ke lie maḡhsūs hai.

¹² Chunāñche gunāh āp ke fānī badan meñ hukūmat na kare. Dhyān deñ ki āp us kī burī ḡhāhishāt ke tābe na ho jāeñ. ¹³ Apne badan ke kisī bhī azu ko gunāh kī ḡhidmat ke lie pesh na kareñ, na use nārāstī kā hathiyār banane deñ. Is

ke bajāe apne āp ko Allāh kī ḳhidmat ke lie pesh karen. Kyoṅki pahle āp murdā the, lekin ab āp zindā ho gae haiṅ. Chunānche apne tamām āzā ko Allāh kī ḳhidmat ke lie pesh karen aur unheṅ rāstī ke hathiyār banane deṅ. ¹⁴ Āindā gunāh āp par hukūmat nahīn karegā, kyoṅki āp apnī zindagī shariyat ke taht nahīn guzārte balki Allāh ke fazl ke taht.

Rāstbāzī ke Ġhulām

¹⁵ Ab sawāl yih hai, chūnki ham shariyat ke taht nahīn balki fazl ke taht haiṅ to kyā is kā matlab yih hai ki hameṅ gunāh karne ke lie khulā chhoṛ diyā gayā hai? Hargiz nahīn! ¹⁶ Kyā āp ko mālūm nahīn ki jab āp apne āp ko kisī ke tābe karke us ke Ġhulām ban jāte haiṅ to āp us mālik ke Ġhulām haiṅ jis ke tābe āp haiṅ? Yā to gunāh āp kā mālik ban kar āp ko maut tak le jāegā, yā farmānbardārī āp kī mālikan ban kar āp ko rāstbāzī tak le jāegī. ¹⁷ Darhaqīqat āp pahle gunāh ke Ġhulām the, lekin Ḳhudā kā shukr hai ki ab āp pūre dil se usī tālīm ke tābe ho gae haiṅ jo āp ke sapurd kī gaī hai. ¹⁸ Ab āp ko gunāh se āzād kar diyā gayā hai, rāstbāzī hī āp kī mālikan ban gaī hai. ¹⁹ (Āp kī fitratī kamzorī kī wajah se main Ġhulāmī kī yih misāl de rahā hūn tāki āp merī bāt samajh pāeṅ.) Pahle āp ne apne āzā ko najāsāt aur bedīnī kī Ġhulāmī meṅ de rakhā thā jis ke natīje meṅ āp kī bedīnī barhtī gaī. Lekin ab āp apne āzā ko rāstbāzī kī Ġhulāmī meṅ de deṅ tāki āp muqaddas ban jāeṅ.

²⁰ Jab gunāh āp kā mālik thā to āp rāstbāzī se āzād the. ²¹ Aur is kā natījā kyā thā? Jo kuchh

āp ne us waqt kiyā us se āp ko āj sharm ātī hai aur us kā anjām maut hai. ²² Lekin ab āp gunāh kī ḡhulāmī se āzād ho kar Allāh ke ḡhulām ban gae haiñ, jis ke natīje meñ āp maḡhsūs-omuḡaddas ban jāte haiñ aur jis kā anjām abadī zindagī hai. ²³ Kyonki gunāh kā ajr maut hai jabki Allāh hamāre Ḳhudāwand Masīh Īsā ke wasīle se hameñ abadī zindagī kī muft nemat atā kartā hai.

7

Shādī kī Misāl

¹ Bhāiyo, āp to sharīat se wāqif haiñ. To kyā āp nahīn jānte ki sharīat us waqt tak insān par iḡhtiyār rakhtī hai jab tak wuh zindā hai? ² Shādī kī misāl leñ. Jab kisī aurat kī shādī hotī hai to sharīat us kā shauhar ke sāth bandhan us waqt tak qāym rakhtī hai jab tak shauhar zindā hai. Agar shauhar mar jāe to phir wuh is bandhan se āzād ho gai. ³ Chunāñche agar wuh apne ḡhāwind ke jīte-jī kisī aur mard kī bīwī ban jāe to use zinākār qarār diyā jātā hai. Lekin agar us kā shauhar mar jāe to wuh sharīat se āzād huī. Ab wuh kisī dūsre mard kī bīwī bane to zinākār nahīn ṡhahartī. ⁴ Mere bhāiyo, yih bāt āp par bhī sādīq ātī hai. Jab āp Masīh ke badan kā hissā ban gae to āp mar kar sharīat ke iḡhtiyār se āzād ho gae. Ab āp us ke sāth paiwast ho gae haiñ jise murdoñ meñ se zindā kiyā gayā tāki ham Allāh kī ḡhidmat meñ phal lāeñ. ⁵ Kyonki jab ham apnī purānī fitrat ke taht zindagī guzārte the to sharīat hamārī gunāhālūdā raḡhbatoñ ko uksātī thī. Phir yihī raḡhbateñ hamāre āzā par

asarandāz hotī thīn aur natīje meñ ham aisā phal lāte the jis kā anjām maut hai. ⁶ Lekin ab ham mar kar shariyat ke bandhan se āzād ho gae haiñ. Ab ham shariyat kī purānī zindagī ke taht k̄hidmat nahīn karte balki Rūhul-quds kī naī zindagī ke taht.

Sharīat aur Gunāh

⁷ Kyā is kā matlab yih hai ki shariyat k̄hud gunāh hai? Hargiz nahīn! Bāt to yih hai ki agar shariyat mujh par mere gunāh zāhir na kartī to mujhe in kā kuchh patā na chaltā. Masalan agar shariyat na batātī, “Lālach na karnā” to mujhe darhaqīqat mālūm na hotā ki lālach kyā hai. ⁸ Lekin gunāh ne is hukm se fāydā uṭhā kar mujh meñ har tarah kā lālach paidā kar diyā. Is ke baraks jahān shariyat nahīn hotī wahān gunāh murdā hai aur aisā kām nahīn kar pātā. ⁹ Ek waqt thā jab maiñ shariyat ke baḡhair zindagī guzārtā thā. Lekin jyon hī hukm mere sāmne āyā to gunāh meñ jān ā gaī ¹⁰ aur maiñ mar gayā. Is tarah mālūm huā ki jis hukm kā maqsad merī zindagī ko qāym rakhnā thā wuhī merī maut kā bāis ban gayā. ¹¹ Kyoñki gunāh ne hukm se fāydā uṭhā kar mujhe bahkāyā aur hukm se hī mujhe mār ḍālā.

¹² Lekin shariyat k̄hud muqaddas hai aur is ke ahkām muqaddas, rāst aur achchhe haiñ. ¹³ Kyā is kā matlab yih hai ki jo achchhā hai wuhī mere lie maut kā bāis ban gayā? Hargiz nahīn! Gunāh hī ne yih kiyā. Is achchhī chīz ko istemāl karke us ne mere lie maut paidā kar dī tāki gunāh zāhir

ho jāe. Yoñ hukm ke zariye gunāh kī sanjīdagī had se zyādā barh jātī hai.

Hamāre Andar kī Kash-ma-kash

¹⁴ Ham jānte haiñ ki sharīat ruhānī hai. Lekin merī fitrat insānī hai, mujhe gunāh kī ghulāmī meñ bechā gayā hai. ¹⁵ Darhaqīqat maiñ nahīn samajhtā ki kyā kartā hūñ. Kyonki maiñ wuh kām nahīn kartā jo karnā chāhtā hūñ balki wuh jis se mujhe nafrat hai. ¹⁶ Lekin agar maiñ wuh kartā hūñ jo nahīn karnā chāhtā to zāhir hai ki maiñ muttāfiq hūñ ki sharīat achchhī hai. ¹⁷ Aur agar aisā hai to phir maiñ yih kām khud nahīn kar rahā balki gunāh jo mere andar sukūnat kartā hai. ¹⁸ Mujhe mālūm hai ki mere andar yānī merī purānī fitrat meñ koī achchhī chīz nahīn bastī. Agarche mujh meñ nek kām karne kā irādā to maujūd hai lekin maiñ use amlī jāmā nahīn pahnā saktā. ¹⁹ Jo nek kām maiñ karnā chāhtā hūñ wuh nahīn kartā balki wuh burā kām kartā hūñ jo karnā nahīn chāhtā. ²⁰ Ab agar maiñ wuh kām kartā hūñ jo maiñ nahīn karnā chāhtā to is kā matlab hai ki maiñ khud nahīn kar rahā balki wuh gunāh jo mere andar bastā hai.

²¹ Chunāñche mujhe ek aur tarah kī sharīat kām kartī huī nazar ātī hai, aur wuh yih hai ki jab maiñ nek kām karne kā irādā rakhtā hūñ to burāī ā maujūd hotī hai. ²² Hāñ, apne bātin meñ to maiñ khushī se Allāh kī sharīat ko māntā hūñ. ²³ Lekin mujhe apne āzā meñ ek aur tarah kī sharīat dikhāī detī hai, aisī sharīat jo merī samajh kī sharīat ke khilāf laṛ kar mujhe gunāh kī sharīat kā qaidī banā detī hai, us sharīat kā

jo mere āzā meñ maujūd hai. ²⁴ Hāy, merī hālat kitnī burī hai! Mujhe is badan se jis kā anjām maut hai kaun chhuṛāegā? ²⁵ Ḳhudā kā shukr hai jo hamāre Ḳhudāwand Īsā Masīh ke wasile se yih kām kartā hai.

Ġharz yihī merī hālat hai, Masīh ke baġhair main Allāh kī shariāt kī ḳhidmat sirf apnī samajh se kar saktā hūn jabki merī purānī fitrat gunāh kī shariāt kī ġhulām rah kar usī kī ḳhidmat kartī hai.

8

Rūh meñ Zindagī

¹ Ab jo Masīh Īsā meñ haiñ unheñ mujrim nahīn ṭhahrāyā jātā. ² Kyonki Rūh kī shariāt ne jo hameñ Masīh meñ zindagī atā kartī hai tujhe gunāh aur maut kī shariāt se āzād kar diyā hai. ³ Mūsawī shariāt hamārī purānī fitrat kī kamzor hālat kī wajah se hameñ na bachā sakī. Is lie Allāh ne wuh kuchh kiyā jo shariāt ke bas meñ na thā. Us ne apnā Farzand bhej diyā tāki wuh gunāhgār kā-sā jism iḳhtiyār karke hamāre gunāhoñ kā kaffārā de. Is tarah Allāh ne purānī fitrat meñ maujūd gunāh ko mujrim ṭhahrāyā ⁴ tāki ham meñ shariāt kā taqāzā pūrā ho jāe, ham jo purānī fitrat ke mutābiq nahīn balki Rūh ke mutābiq chalte haiñ. ⁵ Jo purānī fitrat ke iḳhtiyār meñ haiñ wuh purānī soch rakhte haiñ jabki jo Rūh ke iḳhtiyār meñ haiñ wuh ruhānī soch rakhte haiñ. ⁶ Purānī fitrat kī soch kā anjām maut hai jabki Rūh kī soch zindagī aur salāmatī paidā kartī hai. ⁷ Purānī fitrat kī soch Allāh se

dushmanī rakhtī hai. Yih apne āp ko Allāh kī sharīat ke tābe nahīn rakhtī, na hī aisā kar saktī hai. ⁸ Is lie wuh log Allāh ko pasand nahīn ā sakte jo purānī fitrat ke iḡhtiyār meñ haiñ.

⁹ Lekin āp purānī fitrat ke iḡhtiyār meñ nahīn balki Rūh ke iḡhtiyār meñ haiñ. Shart yih hai ki Rūhul-quds āp meñ basā huā ho. Agar kisī meñ Masīh kā Rūh nahīn to wuh Masīh kā nahīn. ¹⁰ Lekin agar Masīh āp meñ hai to phir āp kā badan gunāh kī wajah se murdā hai jabki Rūhul-quds āp ko rāstbāz ṭhahrāne kī wajah se āp ke lie zindagī kā bāis hai. ¹¹ Us kā Rūh āp meñ bastā hai jis ne Īsā ko murdoñ meñ se zindā kiyā. Aur chūnki Rūhul-quds āp meñ bastā hai is lie Allāh is ke zariye āp ke fānī badanoñ ko bhī Masīh kī tarah zindā karegā.

¹² Chunānche mere bhāiyo, hamārī purānī fitrat kā koī haq na rahā ki hameñ apne mutābiq zindagī guzārne par majbūr kare. ¹³ Kyoñki agar āp apnī purānī fitrat ke mutābiq zindagī guzāreñ to āp halāk ho jāenge. Lekin agar āp Rūhul-quds kī quwwat se apnī purānī fitrat ke ḡhalat kāmoñ ko nest-o-nābūd kareñ to phir āp zindā raheñge. ¹⁴ Jis kī bhī rāhnumāi Rūhul-quds kartā hai wuh Allāh kā farzand hai. ¹⁵ Kyoñki Allāh ne jo Rūh āp ko diyā hai us ne āp ko ḡhulām banā kar ḡhaufzadā hālat meñ nahīn rakhā balki āp ko Allāh ke farzand banā diyā hai, aur usī ke zariye ham pukār kar Allāh ko “Abbā” yānī “Ai Bāp” kah sakte haiñ. ¹⁶ Rūhul-quds ḡhud hamārī rūh ke sāth mil kar gawāhī detā hai ki ham Allāh ke farzand haiñ. ¹⁷ Aur chūnki ham us ke farzand haiñ is lie ham wāris

haiñ, Allāh ke wāris aur Masīh ke hammīrās. Kyoñki agar ham Masīh ke dukh meñ sharīk hoñ to us ke jalāl meñ bhī sharīk hoñge.

Āindā kā Jalāl

¹⁸ Mere khayāl meñ hamārā maujūdā dukh us āne wāle jalāl kī nisbat kuchh bhī nahīñ jo ham par zāhir hogā. ¹⁹ Hāñ, tamām kāynāt yih dekhne ke lie taraptī hai ki Allāh ke farzand zāhir ho jāeñ, ²⁰ kyoñki kāynāt Allāh kī lānat ke taht ā kar fānī ho gāi hai. Yih us kī apnī nahīñ balki Allāh kī marzī thī jis ne us par yih lānat bhejī. To bhī yih ummīd dilāi gāi ²¹ ki ek din kāynāt ko khud us kī fānī hālat kī ghulāmī se chhurāyā jāegā. Us waqt wuh Allāh ke farzandoñ kī jalālī āzādī meñ sharīk ho jāegī. ²² Kyoñki ham jānte haiñ ki āj tak tamām kāynāt karāhtī aur dard-e-zah meñ taraptī rahtī hai. ²³ Na sirf kāynāt balki ham khud bhī andar hī andar karāhte haiñ, go hameñ āne wāle jalāl kā pahlā phal Rūhul-quds kī sūrat meñ mil chukā hai. Ham karāhte karāhte shiddat se is intazār meñ haiñ ki yih bāt zāhir ho jāe ki ham Allāh ke farzand haiñ aur hamāre badanoñ ko najāt mile. ²⁴ Kyoñki najāt pāte waqt hameñ yih ummīd dilāi gāi. Lekin agar wuh kuchh nazar ā chukā hotā jis kī ummīd ham rakhte to yih darhaqīqat ummīd na hotī. Kaun us kī ummīd rakhe jo use nazar ā chukā hai? ²⁵ Lekin chūñki ham us kī ummīd rakhte haiñ jo abhī nazar nahīñ āyā to lāzīm hai ki ham sabar se us kā intazār karen. ²⁶ Isī tarah Rūhul-quds bhī hamārī kamzor hālat meñ hamārī madad kartā hai, kyoñki ham nahīñ jānte ki kis tarah munāsib duā māñgeñ.

Lekin Rūhul-quḏs ḵhud nāqābil-e-bayān āheñ bharte hue hamārī shafā'at kartā hai. ²⁷ Aur Ḵhudā Bāp jo tamām dilon kī tahqīq kartā hai Rūhul-quḏs kī soch ko jāntā hai, kyoñki pāk Rūh Allāh kī marzī ke mutābiq muqaddasīn kī shafā'at kartā hai.

²⁸ Aur ham jānte haiñ ki jo Allāh se muhabbat rakhte haiñ un ke lie sab kuchh mil kar bhalāi kā bāis bantā hai, un ke lie jo us ke irāde ke mutābiq bulāe gae haiñ. ²⁹ Kyoñki Allāh ne pahle se apne logoñ ko chun liyā, us ne pahle se unheñ is ke lie muqarrar kiyā ki wuh us ke Farzand ke hamshakl ban jāeñ aur yoñ Masīh bahut-se bhāiyon meñ pahlauṭhā ho. ³⁰ Lekin jinheñ us ne pahle se muqarrar kiyā unheñ us ne bulāyā bhī, jinheñ us ne bulāyā unheñ us ne rāstbāz bhī ṭhahrāyā aur jinheñ us ne rāstbāz ṭhahrāyā unheñ us ne jalāl bhī baḵshā.

Allāh kī Masīh meñ Muhabbat

³¹ In tamām bāton ke jawāb meñ ham kyā kaheñ? Agar Allāh hamāre haq meñ hai to kaun hamāre ḵhilāf ho saktā hai? ³² Us ne apne Farzand ko bhī dareḡh na kiyā balki use ham sab ke lie dushman ke hawāle kar diyā. Jis ne hameñ apne Farzand ko de diyā kyā wuh hameñ us ke sāth sab kuchh muft nahīn degā? ³³ Ab kaun Allāh ke chune hue logoñ par ilzām lagāegā jab Allāh ḵhud unheñ rāstbāz qarār detā hai? ³⁴ Kaun hameñ mujrim ṭhahrāegā jab Masīh Īsā ne hamāre lie apnī jān dī? Balki hamārī ḵhātir is se bhī zyādā huā. Use zindā kiyā gayā aur wuh Allāh ke dahne hāth baiṭh gayā, jahāñ wuh hamārī shafā'at kartā hai. ³⁵ Ḡharz kaun

hameñ Masīh kī muhabbat se judā karegā? Kyā koī musibat, tangī, izārasānī, kāl, nangāpan, khatrā yā talwār? ³⁶ Jaise kalām-e-muqaddas meñ likhā hai, “Terī khatir hameñ din-bhar maut kā sāmna karnā partā hai, log hameñ zabah hone wālī bheṛon ke barābar samajhte haiñ.” ³⁷ Koī bāt nahīn, kyonki Masīh hamāre sāth hai aur ham se muhabbat rakhtā hai. Us ke wasile se ham in sab khatron ke rūbarū zabardast fatah pāte haiñ. ³⁸ Kyonki mujhe yaqīn hai ki hameñ us kī muhabbat se koī chīz judā nahīn kar sakti: Na maut aur na zindagī, na farishte aur na hukmrān, na hāl aur na mustaqbil, na tāqateñ, ³⁹ na nasheb aur na farāz, na koī aur maḥlūq hameñ Allāh kī us muhabbat se judā kar sakegī jo hameñ hamāre Ḳhudāwand Masīh Īsā meñ hāsil hai.

9

Allāh aur Us kī Qaum

¹ Maiñ Masīh meñ sach kahtā hūn, jhūṭ nahīn boltā, aur merā zamīr bhī Rūhul-quds meñ is kī gawāhī detā hai ² ki maiñ dil meñ apne Yahūdī hamwatanon ke lie shadīd ḡham aur musalsal dard mahsūs kartā hūn. ³ Kāsh mere bhāī aur khūnī rishtedār najāt pāen! Is ke lie maiñ khud malaūn aur Masīh se judā hone ke lie bhī taiyār hūn. ⁴ Allāh ne unhīn ko jo Isrāīlī haiñ apne farzand banane ke lie muqarrar kiyā thā. Unhīn par us ne apnā jalāl zāhir kiyā, unhīn ke sāth apne ahd bāndhe aur unhīn ko shariāt atā kī. Wuhī haqīqī ibādat aur Allāh ke wādon ke haqdār haiñ, ⁵ wuhī Ibrāhīm aur Yāqūb kī aulād

haiñ aur unhīñ meñ se jismānī lihāz se Masīh āyā. Allāh kī tamjīd-o-tārīf abad tak ho jo sab par hukūmat kartā hai! Āmīn.

⁶ Kahne kā matlab yih nahīñ ki Allāh apnā wādā pūrā na kar sakā. Bāt yih nahīñ hai balki yih ki wuh sab haqīqī Isrāīlī nahīñ haiñ jo Isrāīlī qaum se haiñ. ⁷ Aur sab Ibrāhīm kī haqīqī aulād nahīñ haiñ jo us kī nasl se haiñ. Kyoñki Allāh ne kalām-e-muqaddas meñ Ibrāhīm se farmāyā, “Terī nasl Is’hāq hī se qāym rahegī.”

⁸ Chunāñche lāzim nahīñ ki Ibrāhīm kī tamām fitratī aulād Allāh ke farzand hoñ balki sirf wuhī Ibrāhīm kī haqīqī aulād samjhe jāte haiñ jo Allāh ke wāde ke mutābiq us ke farzand ban gae haiñ.

⁹ Aur wādā yih thā, “Muqarrarā waqt par main wāpas āūngā to Sārā ke beṭā hogā.”

¹⁰ Lekin na sirf Sārā ke sāth aisā huā balki Is’hāq kī bīwī Ribqā ke sāth bhī. Ek hī mard yānī hamāre bāp Is’hāq se us ke jurwān bachche paidā hue. ¹¹ Lekin bachche abhī paidā nahīñ hue the na unhoñ ne koī nek yā burā kām kiyā thā ki māñ ko Allāh se ek paighām milā. Is paighām se zāhir hotā hai ki Allāh logoñ ko apne irāde ke mutābiq chun letā hai. ¹² Aur us kā yih chunāo un ke nek āmāl par mabnī nahīñ hotā balki us ke bulāwe par. Paighām yih thā, “Baṛā chhoṭe kī khidmat karegā.” ¹³ Yih bhī kalām-e-muqaddas meñ likhā hai, “Yāqūb mujhe pyārā thā, jabki Esau se main mutanaffir rahā.”

¹⁴ Kyā is kā matlab yih hai ki Allāh be’insāf hai? Hargiz nahīñ! ¹⁵ Kyoñki us ne Mūsā se kahā, “Main jis par mehrbān honā chāhūñ us par mehrbān hotā hūñ aur jis par rahm karnā

chāhūn us par rahm kartā hūn.” ¹⁶ Chunānche sab kuchh Allāh ke rahm par hī mabnī hai. Is meñ insān kī marzī yā koshish kā koī daḥhl nahīn. ¹⁷ Yoñ Allāh apne kalām meñ Misr ke bādshāh Firaun se muḥhātib ho kar farmātā hai, “Maiñ ne tujhe is lie barpā kiyā hai ki tujh meñ apnī qudrat kā izhār karūn aur yoñ tamām duniyā meñ mere nām kā prachār kiyā jāe.” ¹⁸ Ġharz, yih Allāh hī kī marzī hai ki wuh kis par rahm kare aur kis ko saḥt kar de.

Allāh kā Ġhazab aur Rahm

¹⁹ Shāyad koī kahe, “Agar yih bāt hai to phir Allāh kis tarah ham par ilzām lagā saktā hai jab ham se ḡhaltiyān hotī haiñ? Ham to us kī marzī kā muqābalā nahīn kar sakte.” ²⁰ Yih na kaheñ. Ap insān hote hue kaun haiñ ki Allāh ke sāth bahs-mubāhasā karen? Kyā jis ko tashkīl diyā gayā hai wuh tashkīl dene wāle se kahtā hai, “Tū ne mujhe is tarah kyoñ banā diyā?” ²¹ Kyā kumhār kā haq nahīn hai ki gāre ke ek hī launde se muḥhtalif qism ke bartan banāe, kuchh bā-izzat istemāl ke lie aur kuchh zillatāmez istemāl ke lie? ²² Yih bāt Allāh par bhī sādiq ātī hai. Go wuh apnā ḡhazab nāzil karnā aur apnī qudrat zāhir karnā chāhtā thā, lekin us ne bare sabr-otahammul se wuh bartan bardāsht kie jin par us kā ḡhazab ānā hai aur jo halākat ke lie taiyār kie gae haiñ. ²³ Us ne yih is lie kiyā tāki apnā jalāl kasrat se un bartanoñ par zāhir kare jin par us kā fazl hai aur jo pahle se jalāl pāne ke lie taiyār kie gae haiñ. ²⁴ Aur ham un meñ se haiñ jin ko us ne chun liyā hai, na sirf Yahūdiyon meñ se

balki Ġhairyahūdiyon meñ se bhī. ²⁵ Yoñ wuh Ġhairyahūdiyon ke nāte se Hosea kī kitāb meñ farmātā hai,

“Maiñ use ‘Merī Qaum’ kahūngā
jo merī qaum na thī,
aur use ‘Merī Pyārī’ kahūngā
jo mujhe pyārī na thī.”

²⁶ Aur “Jahān unheñ batāyā gayā ki ‘Tum merī qaum nahīñ’

wahāñ wuh ‘Zindā K̄hudā ke Farzand’ kahlāeñge.”

²⁷ Aur Yasāyāh Nabī Isrāīl ke bāre meñ pukārtā hai, “Go Isrāīlī sāhil par kī ret jaise beshumār kyon na hoñ to bhī sirf ek bache hue hisse ko najāt milegī. ²⁸ Kyonki Rab apnā farmān mukammal taur par aur tezī se duniyā meñ pūrā karegā.” ²⁹ Yasāyāh ne yih bāt ek aur peshgoī meñ bhī kī, “Agar Rabbul-afwāj hamārī kuchh aulād zindā na chhoṛtā to ham Sadūm kī tarah miṭ jāte, hamārā Amūrā jaisā satyānās ho jātā.”

Isrāīl ke lie Paulus kī Duā

³⁰ Is se ham kyā kahnā chāhte haiñ? Yih ki go Ġhairyahūdī rāstbāzī kī talāsh meñ na the to bhī unheñ rāstbāzī hāsil huī, aisī rāstbāzī jo imān se paidā huī. ³¹ Is ke baraks Isrāīliyon ko yih hāsil na huī, hālāñki wuh aisī sharīat kī talāsh meñ rahe jo unheñ rāstbāz ṭhahrāe. ³² Is kī kyā wajah thī? Yih ki wuh apnī tamām koshishoñ meñ imān par inhisār nahīñ karte the balki apne nek āmāl par. Unhoñ ne rāh meñ paṛe patthar se ṭhokar khāī. ³³ Yih bāt kalām-e-muqaddas meñ likhī bhī hai,

“Dekho maiñ Siyyūn meñ ek patthar rakh detā
 hūñ
 jo ṭhokar kā bāis banegā,
 ek chaṭān jo ṭhes lagne kā sabab hogī.
 Lekin jo us par īmān læegā
 use sharmindā nahīn kiyā jāegā.”

10

¹ Bhāiyo, merī dilī ārzū aur merī Allāh se duā yih hai ki Isrāīliyon ko najāt mile. ² Maiñ is kī tasdiq kar saktā hūñ ki wuh Allāh kī ḡhairat rakhte haiñ. Lekin is ḡhairat ke pīchhe ruhānī samajh nahīn hotī. ³ Wuh us rāstbāzī se nāwāqif rahe haiñ jo Allāh kī taraf se hai. Is kī bajāe wuh apnī zātī rāstbāzī qāym karne kī koshish karte rahe haiñ. Yoñ unhoñ ne apne āp ko Allāh kī rāstbāzī ke tābe nahīn kiyā. ⁴ Kyoñki Masīh meñ shariāt kā maqsad pūrā ho gayā, hāñ wuh anjām tak pahuñch gaī hai. Chunāñche jo bhī Masīh par īmān rakhtā hai wuhī rāstbāz ṭhahartā hai.

Sab ke lie Rāstbāzī

⁵ Mūsā ne us rāstbāzī ke bāre meñ likhā jo shariāt se hāsil hotī hai, “Jo shaḡhs yoñ karegā wuh jītā rahegā.” ⁶ Lekin jo rāstbāzī īmān se hāsil hotī hai wuh kahtī hai, “Apne dil meñ na kahnā ki ‘Kaun āsmān par chaṛhegā?’ (tāki Masīh ko nīche le āe). ⁷ Yih bhī na kahnā ki ‘Kaun Pātāl meñ utregā?’ (tāki Masīh ko murdoñ meñ se wāpas le āe).” ⁸ To phir kyā karnā chāhie? īmān kī rāstbāzī farmātī hai, “Yih kalām tere qarīb balki tere muñh aur dil meñ maujūd hai.” Kalām se murād īmān kā wuh paighām hai jo ham sunāte haiñ. ⁹ Yānī

yih ki agar tū apne muñh se iqrār kare ki Īsā Ḳhudāwand hai aur dil se imān lāe ki Allāh ne use murdoñ meñ se zindā kar diyā to tujhe najāt milegī. ¹⁰ Kyoñki jab ham dil se imān lāte haiñ to Allāh hameñ rāstbāz qarār detā hai, aur jab ham apne muñh se iqrār karte haiñ to hameñ najāt miltī hai. ¹¹ Yoñ kalām-e-muqaddas farmātā hai, “Jo bhī us par imān lāe use sharmindā nahīn kiyā jāegā.” ¹² Is meñ koī farq nahīn ki wuh Yahūdī ho yā Ġhairyahūdī. Kyoñki sab kā ek hī Ḳhudāwand hai, jo faiyāzī se har ek ko detā hai jo use pukārtā hai. ¹³ Kyoñki “Jo bhī Ḳhudāwand kā nām legā najāt pāegā.”

¹⁴ Lekin wuh kis tarah use pukār sakeñge agar wuh us par kabhī imān nahīn lāe? Aur wuh kis tarah us par imān lā sakte haiñ agar unhoñ ne kabhī us ke bāre meñ sunā nahīn? Aur wuh kis tarah us ke bāre meñ sun sakte haiñ agar kisī ne unheñ yih paighām sunāyā nahīn? ¹⁵ Aur sunāne wāle kis tarah dūstroñ ke pās jāeñge agar unheñ bhejā na gayā? Is lie kalām-e-muqaddas farmātā hai, “Un ke qadam kitne pyāre haiñ jo ḳhushḳhabrī sunāte haiñ.” ¹⁶ Lekin sab ne Allāh kī yih ḳhushḳhabrī qabūl nahīn kī. Yoñ Yasāyāh Nabī farmātā hai, “Aī Rab, kaun hamāre paighām par imān lāyā?” ¹⁷ Ġharz, imān paighām sunane se paidā hotā hai, yānī Masīh kā kalām sunane se.

¹⁸ To phir sawāl yih hai ki kyā Isrāīliyon ne yih paighām nahīn sunā? Unhoñ ne ise zarūr sunā. Kalām-e-muqaddas meñ likhā hai,

“Un kī āwāz nikal kar pūrī duniyā meñ sunāī dī,

un ke alfāz duniyā kī intahā tak pahuñch gae.”

¹⁹ To kyā Isrāīl ko is bāt kī samajh na āī? Nahīn, use zarūr samajh āī. Pahle Mūsā is kā jawāb detā hai,

“Maiñ khud hī tumheñ ghairat dilāūngā,
ek aisī qaum ke zariye jo haqīqat meñ qaum
nahīn hai.

Ek nādān qaum ke zariye maiñ tumheñ ghussā
dilāūngā.”

²⁰ Aur Yasāyāh Nabī yih kahne kī jurrat kartā
hai,

“Jo mujhe talāsh nahīn karte the
unheñ maiñ ne mujhe pāne kā mauqā diyā,
jo mere bāre meñ dariyāft nahīn karte the
un par maiñ zāhir huā.”

²¹ Lekin Isrāīl ke bāre meñ wuh farmātā hai,
“Din-bhar maiñ ne apne hāth phailāe rakhe
tāki ek nāfarmān aur sarkash qaum kā istiqbāl
karūñ.”

11

Isrāīl par Allāh kā Rahm

¹ To kyā is kā yih matlab hai ki Allāh ne apnī
qaum ko radd kiyā hai? Hargiz nahīn! Maiñ
to khud Isrāīlī hūñ. Ibrāhīm merā bhī bāp hai,
aur maiñ Binyamīn ke qabile kā hūñ. ² Allāh
ne apnī qaum ko pahle se chun liyā thā. Wuh
kis tarah use radd karegā! Kyā ap ko mālūm
nahīn ki kalām-e-muqaddas meñ Iliyās Nabī ke
bāre meñ kyā likhā hai? Iliyās ne Allāh ke
sāmne Isrāīlī qaum kī shikāyat karke kahā, ³ “Ai
Rab, unhoñ ne tere nabiyon ko qatl kiyā aur terī
qurbāngāhoñ ko girā diyā hai. Maiñ akelā hī

bachā hūn, aur wuh mujhe bhī mār dālne ke darpai haiñ.”⁴ Is par Allāh ne use kyā jawāb diyā? “Maiñ ne apne lie 7,000 mardoñ ko bachā liyā hai jinhoñ ne apne ghuṭne Bāl Dewatā ke sāmne nahīn ṭeke.”⁵ Āj bhī yihī hālat hai. Isrāil kā ek chhoṭā hissā bach gayā hai jise Allāh ne apne fazl se chun liyā hai.⁶ Aur chūnki yih Allāh ke fazl se huā hai is lie yih un kī apnī koshishoñ se nahīn huā. Warnā fazl fazl hī na rahtā.

⁷ Ġharz, jis chīz kī talāsh meñ Isrāil rahā wuh pūrī qaum ko hāsil nahīn huī balki sirf us ke ek chune hue hisse ko. Bāqī sab ko fazl ke bāre meñ behis kar diyā gayā,⁸ jis tarah kalām-e-muqaddas meñ likhā hai,

“Āj tak Allāh ne unheñ aisī hālat meñ rakhā hai

ki un kī rūh madhosh hai,
un kī ānkheñ dekh nahīn saktīn
aur un ke kān sun nahīn sakte.”

⁹ Aur Dāūd farmātā hai,

“Un kī mez un ke lie phandā aur jāl ban jāe,
is se wuh ṭhokar khā kar apne ḡhalat kāmoñ
kā muāwazā pāeñ.

¹⁰ Un kī ānkheñ tārīk ho jāeñ tāki wuh dekh na sakeñ,

un kī kamr hameshā jhukī rahe.”

¹¹ To kyā Allāh kī qaum ṭhokar khā kar yoñ gir gaī ki kabhī bahāl nahīn hogī? Hargiz nahīn! Us kī ḡhataoñ kī wajah se Allāh ne Ġhairyahūdiyoñ ko najāt pāne kā mauqā diyā tāki Isrāilī ḡhairat khāeñ. ¹² Yoñ Yahūdiyoñ kī ḡhataeñ duniyā ke lie bharpūr barkat kā bāis ban gaīñ, aur un kā nuqsān Ġhairyahūdiyoñ ke lie bharpūr barkat

kā bāis ban gayā. To phir yih barkat kitnī aur zyādā hogī jab Yahūdiyon kī pūrī tādād is meñ shāmil ho jāegī!

Ġhairyahūdiyon kī Najāt

¹³ Āp ko jo Ġhairyahūdī haiñ main yih batātā hūñ, Allāh ne mujhe Ġhairyahūdiyon ke lie rasūl banāyā hai, is lie main apnī is k̄hidmat par zor detā hūñ. ¹⁴ Kyonki main chāhtā hūñ ki merī qaum ke log yih dekh kar Ġhairat khāeñ aur un meñ se kuchh bach jāeñ. ¹⁵ Jab unheñ radd kiyā gayā to bāqī duniyā kī Allāh ke sāth sulah ho gaī. To phir kyā hogā jab unheñ dubārā qabūl kiyā jāegā? Yih murdoñ meñ se jī uṭhne ke barābar hogā!

¹⁶ Jab āp fasal ke pahle āṭe se roṭī banā kar Allāh ke lie maḵsūs-o-muqaddas karte haiñ to bāqī sārā āṭā bhī maḵsūs-o-muqaddas hai. Aur jab daraḵht kī jaṛeñ muqaddas haiñ to us kī shāḵheñ bhī muqaddas haiñ. ¹⁷ Zaitūn ke daraḵht kī kuchh shāḵheñ toṛ dī gaī haiñ aur un kī jagah janglī zaitūn ke daraḵht kī ek shāḵh paiwand kī gaī hai. Āp Ġhairyahūdī is janglī shāḵh se mutābiqat rakhte haiñ. Jis tarah yih dūsre daraḵht kī jaṛ se ras aur taqwiyaṭ pātī hai usī tarah āp bhī Yahūdī qaum kī ruhānī jaṛ se taqwiyaṭ pāte haiñ. ¹⁸ Chunāñche āp kā dūsri shāḵhoñ ke sāmne sheḵhī mārne kā haq nahīñ. Aur agar āp sheḵhī māreñ to yih khayāl kareñ ki āp jaṛ ko qāym nahīñ rakhte balki jaṛ āp ko.

¹⁹ Shāyad āp is par etarāz kareñ, “Hāñ, lekin dūsri shāḵheñ toṛī gaīñ tāki main paiwand kiyā jāūñ.” ²⁰ Beshak, lekin yād rakheñ, dūsri

shākheñ is lie toṛī gaīñ ki wuh īmān nahīñ rakhtī thīñ aur āp is lie un kī jagah lage haiñ ki āp īmān rakhte haiñ. Chunāñche apne āp par fakhr na kareñ balki khauf rakheñ. ²¹ Allāh ne aslī shākheñ bachne na dīñ. Agar āp is tarah kī harkateñ kareñ to kyā wuh āp ko chhoṛ degā? ²² Yahāñ hameñ Allāh kī mehrbānī aur saḡhtī nazar ātī hai—jo gir gae haiñ un ke silsile meñ us kī saḡhtī, lekin āp ke silsile meñ us kī mehrbānī. Aur yih mehrbānī rahegī jab tak āp us kī mehrbānī se lipṭe raheñge. Warnā āp ko bhī daraḡht se kāt ḡālā jāegā. ²³ Aur agar Yahūdī apne kufr se bāz āeñ to un kī paiwandkāri dubārā daraḡht ke sāth kī jāegī, kyonki Allāh aisā karne par qādir hai. ²⁴ Ākhir āp kḡhud qudratī taur par zaitūn ke janglī daraḡht kī shākḡ the jise Allāh ne toṛ kar qudratī qawānīn ke kḡhilāf zaitūn ke asal daraḡht par lagāyā. To phir wuh kitnī zyādā āsānī se Yahūdiyōñ kī toṛī gaī shākheñ dubārā un ke apne daraḡht meñ lagā degā!

Allāh kā Rahm Sab Par

²⁵ Bhāiyo, main chāhtā hūñ ki āp ek bhed se wāqif ho jāeñ, kyonki yih āp ko apne āp ko dānā samajhne se bāz rakhegā. Bhed yih hai ki Isrāīl kā ek hissā Allāh ke fazl ke bāre meñ behis ho gayā hai, aur us kī yih hālat us waqt tak rahegī jab tak Ghairyahūdiyōñ kī pūrī tādād Allāh kī bādshāhī meñ dākḡhil na ho jāe. ²⁶ Phir pūrā Isrāīl najāt pāegā. Yih kalām-e-muqaddas meñ bhī likhā hai,

“Chhurāne wālā Siyyūn se āegā.

Wuh bedinī ko Yāqūb se haṭā degā.

²⁷ Aur yih merā un ke sāth ahd hogā jab maiñ un ke gunāhoñ ko un se dūr karūñga.”

²⁸ Chūnki Yahūdī Allāh kī ḡhushḡhabrī qabūl nahīñ karte is lie wuh Allāh ke dushman haiñ, aur yih bāt āp ke lie fayde kā bāis ban gaī hai. To bhī wuh Allāh ko pyāre haiñ, is lie ki us ne un ke bāpdādā Ibrāhīm, Is'hāq aur Yāqūb ko chun liyā thā. ²⁹ Kyoñki jab bhī Allāh kisī ko apñī nematoñ se nawāz kar bulātā hai to us kī yih nemateñ aur bulāwe kabhī nahīñ miṭne kī. ³⁰ Māzī meñ ḡhairyahūdī Allāh ke tābe nahīñ the, lekin ab Allāh ne āp par Yahūdiyoñ kī nāfarmānī kī wajah se rahm kiyā hai. ³¹ Ab is ke ulaṭ hai ki Yahūdī ḡhud āp par kie gae rahm kī wajah se Allāh ke tābe nahīñ haiñ, aur lāzim hai ki Allāh un par bhī rahm kare. ³² Kyoñki us ne sab ko nāfarmānī ke qaidī banā diyā hai tāki sab par rahm kare.

Allāh kī Tamjīd

³³ Wāh! Allāh kī daulat, hikmat aur ilm kyā hī gahrā hai. Kaun us ke faisloñ kī tah tak pahuñch saktā hai! Kaun us kī rāhoñ kā khoj lagā saktā hai! ³⁴ Kalām-e-muqaddas yoñ farmātā hai,

“Kis ne Rab kī soch ko jānā?

Yā kaun itnā ilm rakhtā hai

ki wuh use mashwarā de? ³⁵ Kyā kisī ne kabhī use kuchh diyā

ki use is kā muāwazā denā paṛe?”

³⁶ Kyoñki sab kuchh usī ne paidā kiyā hai, sab kuchh usī ke zariye aur usī ke jalāl ke lie qāym hai. Usī kī tamjīd abad tak hotī rahe! Āmīn.

12

Pūrī Zindagī Allāh kī Ḳhidmat Meñ

¹ Bhāiyo, Allāh ne āp par kitnā rahm kiyā hai! Ab zarūrī hai ki āp apne badanoñ ko Allāh ke lie maḵsūs karen, ki wuh ek aisī zindā aur muqaddas qurbānī ban jāen jo use pasand āe. Aisā karne se āp us kī māqūl ibādat karenge.

² Is duniyā ke sānche meñ na ḍhal jāen balki Allāh ko āp kī soch kī tajdīd karne deñ tāki āp wuh shakl-o-sūrat apnā sakeñ jo use pasand hai. Phir āp Allāh kī marzī ko pahchān sakeñge, wuh kuchh jo achchhā, pasandīdā aur kāmīl hai.

³ Us rahm kī binā par jo Allāh ne mujh par kiyā main āp meñ se har ek ko hidāyat detā hūñ ki apnī haqīqī haisiyat ko jān kar apne āp ko is se zyādā na samjheñ. Kyoñki jis paimāne se Allāh ne har ek ko imān baḵshhā hai usī ke mutābiq wuh samajhdārī se apnī haqīqī haisiyat ko jān le.

⁴ Hamāre ek hī jism meñ bahut-se āzā haiñ, aur har ek azu kā farq farq kām hotā hai. ⁵ Isī tarah go ham bahut haiñ, lekin Masīh meñ ek hī badan haiñ, jis meñ har azu dūsroñ ke sāth jurā huā hai. ⁶ Allāh ne apne fazl se har ek ko mukhtalif nematoñ se nawāzā hai. Agar āp kī nemat nabuwwat karnā hai to apne imān ke mutābiq nabuwwat karen.

⁷ Agar āp kī nemat ḳhidmat karnā hai to ḳhidmat karen. Agar āp kī nemat tālīm denā hai to tālīm deñ. ⁸ Agar āp

kī nemat hauslā-afzāī karnā hai to hauslā-afzāī karen. Agar āp kī nemat dūsron kī zarūriyāt pūrī karnā hai to ḳhulūsdilī se yihī karen. Agar āp kī nemat rāhnumāī karnā hai to sargarmī se rāhnumāī karen. Agar āp kī nemat rahm karnā hai to ḳhushī se rahm karen.

⁹ Āp kī muhabbat mahz dikhāwe kī na ho. Jo kuchh burā hai us se nafrat karen aur jo kuchh achchhā hai us ke sāth liṭṭe raheñ. ¹⁰ Āp kī ek dūsre ke lie barādarānā muhabbat sargarm ho. Ek dūsre kī izzat karne meñ āp ḳhud pahlā qadam uṭhāeñ. ¹¹ Āp kā josh ḳhīlā na par jāe balki ruhānī sargarmī se Ḳhudāwand kī ḳhidmat karen. ¹² Ummīd meñ ḳhush, musibat meñ sābitqadam aur duā meñ lage raheñ. ¹³ Jab muqaddasīn zarūratmand haiñ to un kī madad karne meñ sharīk hoñ. Mehmān-nawāzī meñ lage raheñ.

¹⁴ Jo āp ko īzā pahuñchāeñ un ko barkat deñ. Un par lānat mat karen balki barkat chāheñ. ¹⁵ Ḳhushī manāne wāloñ ke sāth ḳhushī manāeñ aur rone wāloñ ke sāth roeñ. ¹⁶ Ek dūsre ke sāth achchhe tālluqāt rakheñ. Uñchī soch na rakheñ balki dabe huoñ se rifāqat rakheñ. Apne āp ko dānā mat samjheñ.

¹⁷ Agar koī āp se burā sulūk kare to badle meñ us se burā sulūk na karnā. Dhyān rakheñ ki jo kuchh sab kī nazar meñ achchhā hai wuhī amal meñ lāeñ. ¹⁸ Apnī taraf se pūrī koshish karen ki jahāñ tak mumkin ho sab ke sāth mel-milāp rakheñ. ¹⁹ Azīzo, intaqām mat leñ balki Allāh ke ḡhazab ko badlā lene kā mauqā deñ. Kyonki kalām-e-muqaddas meñ likhā hai, “Rab farmātā

hai, intaqām lenā merā hī kām hai, main hī badlā lūngā.”²⁰ Is ke bajāe “Agar terā dushman bhūkā ho to use khānā khilā, agar pyāsā ho to pānī pilā. Kyoṅki aisā karne se tū us ke sar par jalte hue koeloṅ kā ḍher lagāegā.”²¹ Apne par burāi ko ḡhālib na āne deṅ balki bhalāi se āp burāi par ḡhālib āeṅ.

13

Riāyā ke Farāyz

¹ Har shaḡhs iḡhtiyār rakhne wāle hukmrānoṅ ke tābe rahe, kyoṅki tamām iḡhtiyār Allāh kī taraf se hai. Jo iḡhtiyār rakhte haiṅ unheṅ Allāh kī taraf se muḡarrar kiyā gayā hai. ² Chunāṅche jo hukmrān kī muḡhālafat kartā hai wuh Allāh ke farmān kī muḡhālafat kartā aur yoṅ apne āp par Allāh kī adālat lātā hai. ³ Kyoṅki hukmrān un ke lie ḡhauf kā bāis nahīn hote jo sahīh kām karte haiṅ balki un ke lie jo ḡhalat kām karte haiṅ. Kyā āp hukmrān se ḡhauf khāe baḡhair zindagī guzārnā chāhte haiṅ? To phir wuh kuchh karenṅ jo achchhā hai to wuh āp ko shābāsh degā. ⁴ Kyoṅki wuh Allāh kā ḡhādim hai jo āp kī behtarī ke lie ḡhidmat kartā hai. Lekin agar āp ḡhalat kām karenṅ to ḍareṅ, kyoṅki wuh apnī talwār ko ḡhāhmaḡhāh thāme nahīn rakhtā. Wuh Allāh kā ḡhādim hai aur us kā ḡhazab ḡhalat kām karne wāle par nāzil hotā hai. ⁵ Is lie lāzim hai ki āp hukūmat ke tābe raheṅ, na sirf sazā se bachne ke lie balki is lie bhī ki āp ke zamīr par dāḡh na lage.

⁶ Yihī wajah hai ki āp ṭaiks adā karte haiñ, kyonki sarkārī mulāzim Allāh ke ḳhādīm haiñ jo is ḳhidmat ko saranjām dene meñ lage rahte haiñ. ⁷ Chunāñche har ek ko wuh kuchh deñ jo us kā haq hai, ṭaiks lene wāle ko ṭaiks aur kaṣṭam ḍyūṭī lene wāle ko kaṣṭam ḍyūṭī. Jis kā ḳhauf rakhnā āp par farz hai us kā ḳhauf māneñ aur jis kā ehtirām karnā āp par farz hai us kā ehtirām kareñ.

Ek Dūsre ke lie Farāyz

⁸ Kisī ke bhī qarzdār na raheñ. Sirf ek qarz hai jo āp kabhī nahīñ utār sakte, ek dūsre se muhabbat rakhne kā qarz. Yih karte raheñ kyonki jo dūsron se muhabbat rakhtā hai us ne sharīat ke tamām taqāze pūre kie haiñ. ⁹ Masalan sharīat meñ likhā hai, “Qatl na karnā, zinā na karnā, chorī na karnā, lālach na karnā.” Aur dīgar jītne ahkām haiñ is ek hī hukm meñ samāe hue haiñ ki “Apne paṛosī se waisī muhabbat rakhnā jaisī tū apne āp se rakhtā hai.” ¹⁰ Jo kisī se muhabbat rakhtā hai wuh us se ḡhalat sulūk nahīñ kartā. Yoñ muhabbat sharīat ke tamām taqāze pūre kartī hai.

¹¹ Aisā karnā lāzim hai, kyonki āp ḳhud is waqt kī ahmiyat ko jānte haiñ ki nīnd se jāg uṭhne kī ḡharī ā chukī hai. Kyonki jab ham īmān lāe the to hamārī najāt itnī qarīb nahīñ thī jītne ki ab hai. ¹² Rāt ḍhalne wālī hai aur din nikalne wālā hai. Is lie aeñ, ham tārīkī ke kām gande kapron kī tarah utār kar nūr ke hathiyār bāndh leñ. ¹³ Ham sharīf zindagī guzāreñ, aise logon kī tarah jo din kī raushnī meñ chalte haiñ. Is lie lāzim hai ki ham in chīzon se bāz raheñ:

badmastoñ kī rangraliyon̄ aur sharābnoshī se, zinākārī aur aiyāshī se, aur jhagaṛe aur hasad se. ¹⁴ Is ke bajāe Ḳhudāwand Īsā Masīh ko pahan leñ aur apnī purānī fitrat kī parwarish yoñ na karen̄ ki gunāhālūdā ḳhāhishāt bedār ho jāeñ.

14

Ek Dūsre ko Mujrim Mat Ṭhahrānā

¹ Jis kā īmān kamzor hai use qabūl karen̄, aur us ke sāth bahs-mubāhasā na karen̄. ² Ek kā īmān to use har chīz khāne kī ijāzat detā hai jabki kamzor īmān rakhne wālā sirf sabziyān khātā hai. ³ Jo sab kuchh khātā hai wuh use haqīr na jāne jo yih nahīñ kar saktā. Aur jo yih nahīñ kar saktā wuh use mujrim na ṭhahrāe jo sab kuchh khātā hai, kyonki Allāh ne use qabūl kiyā hai. ⁴ Āp kaun haiñ ki kisī aur ke ḡhulām kā faislā karen̄? Us kā apnā mālik faislā karegā ki wuh khaṛā rahe yā gir jāe. Aur wuh zarūr khaṛā rahegā, kyonki Ḳhudāwand use qāym rakhne par qādir hai.

⁵ Kuchh log ek din ko dūsre dinon̄ kī nisbat zyādā aham qarār dete haiñ jabki dūsre tamām dinon̄ kī ahmiyat barābar samajhte haiñ. Āp jo bhī ḳhayāl rakheñ, har ek use pūre yaqīn ke sāth rakhe. ⁶ Jo ek din ko ḳhās qarār detā hai wuh is se Ḳhudāwand kī tāzīm karnā chāhtā hai. Isī tarah jo sab kuchh khātā hai wuh is se Ḳhudāwand ko jalāl denā chāhtā hai. Yih is se zāhir hotā hai ki wuh is ke lie Ḳhudā kā shukr kartā hai. Lekin jo kuchh khānon̄ se parhez kartā hai wuh bhī Ḳhudā kā shukr karke is se

us kī tāzīm karnā chāhtā hai. ⁷ Bāt yih hai ki ham meñ se koī nahīñ jo sirf apne wāste zindagī guzartā hai aur koī nahīñ jo sirf apne wāste martā hai. ⁸ Agar ham zindā haiñ to is lie ki Ḳhudāwand ko jalāl deñ, aur agar ham mareñ to is lie ki ham Ḳhudāwand ko jalāl deñ. Ġharz ham Ḳhudāwand hī ke haiñ, ḳhāh zindā hoñ yā murdā. ⁹ Kyoñki Masīh isī maq̄sad ke lie muā aur jī uṭhā ki wuh murdoñ aur zindoñ donoñ kā mālik ho. ¹⁰ To phir āp jo sirf sabzī khāte haiñ apne bhāi ko mujrim kyoñ ṭhahrāte haiñ? Aur āp jo sab kuchh khāte haiñ apne bhāi ko haqīr kyoñ jānte haiñ? Yād rakheñ ki ek dīn ham sab Allāh ke taḳht-e-adālat ke sāmne khare hoñge.

¹¹ Kalām-e-muqaddas meñ yihī likhā hai,
 Rab farmātā hai, “Merī hayāt kī qasam,
 har ghuṭnā mere sāmne jhukegā
 aur har zabān Allāh kī tamjīd karegī.”

¹² Hāñ, ham meñ se har ek ko Allāh ke sāmne apnī zindagī kā jawāb denā paregā.

Dūsroñ ke lie Girne kā Bāis na Banā

¹³ Chunāñche aeñ, ham ek dūsre ko mujrim na ṭhahrāeñ. Pūre azm ke sāth is kā ḳhayāl rakheñ ki āp apne bhāi ke lie ṭhokar khāne yā gunāh meñ girne kā bāis na baneñ. ¹⁴ Mujhe Ḳhudāwand Masīh meñ ilm aur yaqīn hai ki koī bhī khānā bazāt-e-ḳhud nāpāk nahīñ hai. Lekin jo kisī khāne ko nāpāk samajhtā hai us ke lie wuh khānā nāpāk hī hai. ¹⁵ Agar āp apne bhāi ko apne kisī khāne ke bāis pareshān kar rahe haiñ to āp muhabbat kī rūh meñ zindagī nahīñ guzār rahe. Apne bhāi ko apne khāne

se halāk na karen. Yād rakheñ ki Masīh ne us ke lie apnī jān dī hai. ¹⁶ Aisā na ho ki log us achchhī chīz par kufr bakeñ jo āp ko mil gāi hai. ¹⁷ Kyonki Allāh kī bādshāhī khāne-pīne kī chīzon par qāym nahīn hai balki rāstbāzī, sulah-salāmatī aur Rūhul-quds meñ khushī par. ¹⁸ Jo yon Masīh kī khidmat kartā hai wuh Allāh ko pasand aur insānon ko manzūr hai.

¹⁹ Chunānche āen, ham pūrī jidd-o-jahd ke sāth wuh kuchh karne kī koshish karen jo sulah-salāmatī aur ek dūstre kī ruhānī tāmīr-o-taraqqī kā bāis hai. ²⁰ Allāh kā kām kisī khāne kī khātir barbād na karen. Har khānā pāk hai, lekin agar āp kuchh khāte haiñ jis se dūstre ko thes lage to yih ghalat hai. ²¹ Behtar yih hai ki na āp gosht khāen, na mai pieñ aur na koī aur qadam uṭhāen jis se āp kā bhāi thokar khāe. ²² Jo bhī imān āp is nāte se rakhte haiñ wuh āp aur Allāh tak maḥdūd rahe. Mubāarak hai wuh jo kisī chīz ko jāyz qarār de kar apne āp ko mujrim nahīn thahrātā. ²³ Lekin jo shak karte hue koī khānā khātā hai use mujrim thahrāyā jātā hai, kyonki us kā yih amal imān par mabnī nahīn hai. Aur jo bhī amal imān par mabnī nahīn hotā wuh gunāh hai.

15

Burdbārī

¹ Ham tāqatwaron kā farz hai ki kamzoron kī kamzoriyān bardāsht karen. Ham sirf apne āp ko khush karne kī khātir zindagī na guzāren ² balki har ek apne paṛosī ko us kī behtarī aur ruhānī tāmīr-o-taraqqī ke lie khush kare.

³ Kyoṅki Masīh ne bhī ḵhud ko ḵhush rakhne ke lie zindagī nahīn guzārī. Kalām-e-muqaddas meṅ us ke bāre meṅ yihī likhā hai, “Jo tujhe gāliyān dete haiṅ un kī gāliyān mujh par ā gā haiṅ.” ⁴ Yih sab kuchh hamēṅ hamārī nasīhat ke lie likhā gayā tāki ham sābitqadmī aur kalām-e-muqaddas kī hauslā-afzā bātoṅ se ummīd pāēṅ. ⁵ Ab sābitqadmī aur hauslā dene wālā Ḵhudā āp ko taufiq de ki āp Masīh Īsā kā namūnā apnā kar yagāngat kī rūh meṅ ek dūsre ke sāth zindagī guzāreṅ. ⁶ Tab hī āp mil kar ek hī āwāz ke sāth Ḵhudā, hamāre Ḵhudāwand Īsā Masīh ke Bāp ko jalāl de sakeṅge.

Ġhairyahūdiyōn ke lie Ḵhushḵhabrī

⁷ Chunānche jis tarah Masīh ne āp ko qabūl kiyā hai usī tarah ek dūsre ko bhī qabūl karen tāki Allāh ko jalāl mile. ⁸ Yād rakheṅ ki Masīh Allāh kī sadāqat kā izhār karke Yahūdiyōn kā ḵhādīm banā tāki un wādoṅ kī tasdiq kare jo Ībrāhīm, Is'hāq aur Yāqūb se kie gae the. ⁹ Wuh is lie bhī ḵhādīm banā ki Ġhairyahūdī Allāh ko us rahm ke lie jalāl deṅ jo us ne un par kiyā hai. Kalām-e-muqaddas meṅ yihī likhā hai,

“Is lie maiṅ aqwām meṅ terī hamd-o-sanā karūṅga,

tere nām kī tārif meṅ gīt gāūṅgā.”

¹⁰ Yih bhī likhā hai,

“Ai dīgar qaumo, us kī ummat ke sāth ḵhushī manāo!”

¹¹ Phir likhā hai,

“Ai tamām aqwām, Rab kī tamjīd karo!

Ai tamām ummato, us kī satāish karo!”

12 Aur Yasāyāh Nabī yih farmātā hai,
 “Yassī kī jaṛ se ek koṅpal phūṭ niklegī,
 ek aisā ādmī uṭhegā
 jo qaumon par hukūmat karegā.
 Ġhairyahūdī us par ās rakheṅge.”

13 Ummīd kā Ḳhudā āp ko imān rakhne ke
 bāis har ḳhushī aur salāmatī se māmūr kare tāki
 Rūhul-quḏs kī quḏrat se āp kī ummīd baṛh kar
 dil se chhalak jāe.

Dilerī se Likhne kī Wajah

14 Mere bhāiyo, mujhe pūrā yaqīn hai ki āp
 ḳhud bhalāī se māmūr haiṅ, ki āp har tarah kā
 ilm-o-irfān rakhte haiṅ aur ek dūsre ko naṣīhat
 karne ke qābil bhī haiṅ. 15 To bhī maiṅ ne
 yād dilāne kī ḳhātir āp ko kāī bāteṅ likhne
 kī dilerī kī hai. Kyonki maiṅ Allāh ke fazl se
 16 āp Ġhairyahūdiyōn ke lie Masīh Īsā kā ḳhādim
 hūṅ. Aur maiṅ Allāh kī ḳhushḳhabrī phailāne
 meṅ Baitul-muqaddas ke imām kī-sī ḳhidmat
 saranjām detā hūṅ tāki āp ek aisī qurbānī ban
 jāeṅ jo Allāh ko pasand āe aur jise Rūhul-
 quḏs ne us ke lie maḳhsūs-o-muqaddas kiyā
 ho. 17 Chunānche maiṅ Masīh Īsā meṅ Allāh
 ke sāmne apnī ḳhidmat par faḳhr kar saktā
 hūṅ. 18 Kyonki maiṅ sirf us kām ke bāre meṅ
 bāt karne kī jurrat karūṅga jo Masīh ne merī
 mārifat kiyā hai aur jis se Ġhairyahūdī Allāh
 ke tābe ho gae haiṅ. Hāṅ, Masīh hī ne yih
 kām kalām aur amal se, 19 ilāhī nishānon aur
 mojizon kī quwwat se aur Allāh ke Rūh kī quḏrat
 se saranjām diyā hai. Yon maiṅ ne Yarūshalam
 se le kar sūbā illurikum tak safr karte karte

Allāh kī ḡhushḡhabrī phailāne kī ḡhidmat pūrī kī hai. ²⁰ Aur main̄ ise apnī izzat kā bāis samjhā ki ḡhushḡhabrī wahān̄ sunāūn̄ jahān̄ Masīh ke bāre meṅ ḡhabar nahīn̄ pahuñchī. Kyoñki main̄ aisi buniyād par tāmīr nahīn̄ karnā chāhtā thā jo kisī aur ne ḡālī thī. ²¹ Kalām-e-muḡaddas̄ yihī farmātā hai,

“Jinheṅ us ke bāre meṅ nahīn̄ batāyā gayā wuh dekheṅge,
aur jinhoṅ ne nahīn̄ sunā
unheṅ samajh āegī.”

Paulus kā Rom Jāne kā Irādā

²² Yihī wajah hai ki mujhe itnī dafā āp ke pās āne se rokā gayā hai. ²³ Lekin ab merī in̄ ilāqon̄ meṅ ḡhidmat pūrī ho chukī hai. Aur chūñki main̄ itne sālon̄ se āp ke pās āne kā ārzūmand rahā hūn̄ ²⁴ is lie ab yih̄ ḡhāhish̄ pūrī karne kī ummīd rakhtā hūn̄. Kyoñki main̄ ne spen jāne kā mansūbā banāyā hai. Ummīd hai ki rāste meṅ āp se milūngā aur āp āge ke safr ke lie merī madad̄ kar sakeṅge. Lekin pahle main̄ kuchh der ke lie āp kī rifāqat se lutfandoz honā chāhtā hūn̄. ²⁵ Is waḡt main̄ Yarūshalam̄ jā rahā hūn̄ tāki wahān̄ ke muḡaddasīn̄ kī ḡhidmat karūn̄. ²⁶ Kyoñki Makiduniyā aur Aḡhayā kī jamāton̄ ne Yarūshalam̄ ke un̄ muḡaddasīn̄ ke lie hadiyā jamā karne kā faislā kiyā hai jo ḡharīb haiñ. ²⁷ Unhoṅ ne yih̄ ḡhushī se kiyā aur darasl̄ yih̄ un̄ kā farz bhī hai. ḡhairyahūdī to Yahūdīyon̄ kī ruhānī barkaton̄ meṅ sharīk hue haiñ, is lie ḡhairyahūdīyon̄ kā farz hai ki wuh Yahūdīyon̄ ko bhī apnī māli barkaton̄ meṅ sharīk karke un

kī k̄hidmat karen. ²⁸ Chunānche apnā yih farz adā karne aur maqāmī bhāiyon kā yih sārā phal Yarūshalam ke imāndāron tak pahuñchāne ke bād maiñ āp ke pās se hotā huā spen jāūngā. ²⁹ Aur maiñ jāntā hūñ ki jab maiñ āp ke pās āūngā to Masīh kī pūrī barkat le kar āūngā.

³⁰ Bhāiyo, maiñ hamāre K̄hudāwand Īsā Masīh aur Rūhul-quds kī muhabbat ko yād dilā kar āp se minnat kartā hūñ ki āp mere lie Allāh se duā karen aur yon merī ruhānī jang meñ sharīk ho jāen. ³¹ Is ke lie duā karen ki maiñ sūbā Yahūdiyā ke ġhairimāndāron se bachā rahūñ aur ki merī Yarūshalam meñ k̄hidmat wahāñ ke muqaddasīn ko pasand āe. ³² Kyoñki maiñ chāhtā hūñ ki jab maiñ Allāh kī marzī se āp ke pās āūngā to mere dil meñ k̄hushī ho aur ham ek dūsre kī rifāqat se tar-o-tāzā ho jāen. ³³ Salāmatī kā K̄hudā āp sab ke sāth ho. Āmīn.

16

Salām-o-Duā

¹ Hamārī bahan Fībe āp ke pās ā rahī hai. Wuh Kinḡhriyā Shahr kī jamāt meñ k̄hadimā hai. Maiñ us kī sifārish kartā hūñ ² balki K̄hudāwand meñ arz hai ki āp us kā waise hī istiqbāl karen jaise ki muqaddasīn ko karnā chāhie. Jis muāmale meñ bhī use āp kī madad kī zarūrat ho us meñ us kā sāth deñ, kyoñki us ne bahut logoñ kī balki merī bhī madad kī hai.

³ Priskillā aur Akwilā ko merā salām denā jo Masīh Īsā meñ mere hamk̄hidmat rahe haiñ.

⁴ Unhoñ ne mere lie apnī jān par khelā. Na

sirf main balki Ghairyahūdiyon kī jamāteñ un kī ehsānmand haiñ. ⁵ Un ke ghar meñ jamā hone wālī jamāt ko bhī merā salām denā.

Mere azīz dost Ipinetus ko merā salām denā. Wuh sūbā Āsiyā meñ Masīh kā pahlā pairokār yānī us ilāqe kī fasal kā pahlā phal thā. ⁶ Mariyam ko merā salām jis ne āp ke lie baṛī mehnat-mashaqqat kī hai. ⁷ Andrūnikus aur Yūniyā ko merā salām. Wuh mere hamwatan haiñ aur jel meñ mere sāth waqt guzārā hai. Rasūloñ meñ wuh numāyāñ haisiyat rakhte haiñ, aur wuh mujh se pahle Masīh ke pīchhe ho lie the.

⁸ Ampliyātus ko salām. Wuh Khudāwand meñ mujhe azīz hai. ⁹ Masīh meñ hamāre hamkhidmat Urbānus ko salām aur isī tarah mere azīz dost Istakhus ko bhī. ¹⁰ Apellis ko salām jis kī Masīh ke sāth wafādārī ko āzmāyā gayā hai. Aristubūlus ke ghar wāloñ ko salām. ¹¹ Mere hamwatan Herodiyon ko salām aur isī tarah Narkissus ke un ghar wāloñ ko bhī jo Masīh ke pīchhe ho lie haiñ.

¹² Trūfenā aur Trūfosā ko salām jo Khudāwand kī khidmat meñ mehnat-mashaqqat kartī haiñ. Merī azīz bahan parris ko salām jis ne Khudāwand kī khidmat meñ baṛī mehnat-mashaqqat kī hai. ¹³ Hamāre Khudāwand ke chune hue bhāī Rūfus ko salām aur isī tarah us kī mān ko bhī jo merī mān bhī hai. ¹⁴ Asinkritis, Faligon, Hirmes, Patrobās, Hirmās aur un ke sāthī bhāiyon ko merā salām denā. ¹⁵ Filulugus aur Yūliyā, Neriyūs aur us kī bahan, Ulimpās aur un ke sāth tamām muqaddasīn ko salām.

¹⁶ Ek dūsre ko muqaddas bosā de kar salām karen. Masīh kī tamām jamāton kī taraf se āp ko salām.

Ākhirī Hidāyāt

¹⁷ Bhāiyo, main āp ko tākīd kartā hūn ki āp un se khabardār raheñ jo pārtībāzī aur thokar kā bāis bante haiñ. Yih us tālīm ke khalīf hai jo āp ko dī gāi hai. Un se kinārā karen ¹⁸ kyonki aise log hamāre Kḥudāwand Masīh kī kḥidmat nahīn kar rahe balki apne peṭ kī. Wuh apnī miṭhī aur chiknī-chuprī bāton se sādālah logoñ ke dilon ko dhokā dete haiñ. ¹⁹ Āp kī farmānbardārī kī khabar sab tak pahuñch gāi hai. Yih dekh kar main āp ke bāre meñ kḥush hūn. Lekin main chāhtā hūn ki āp achchhā kām karne ke lihāz se dānishmand aur burā kām karne ke lihāz se beqūsūr hoñ. ²⁰ Salāmatī kā Kḥudā jald hī Iblīs ko āp ke pānwoñ tale kuchalwā dālegā.

Hamāre Kḥudāwand Īsā kā fazl āp ke sāth ho.

²¹ Merā hamkḥidmat Tīmuthiyus āp ko salām detā hai, aur isī tarah mere hamwatan Lūkiyus, Yāson aur Sosipātrus.

²² Main, Tirtiyus is khat kā kātib hūn. Merī taraf se bhī Kḥudāwand meñ āp ko salām.

²³ Gayus kī taraf se āp ko salām. Main aur pūrī jamāt us ke mehmān rahe haiñ. Shahr ke kḥazāñchī Irāstus aur hamāre bhāi Kwārtus bhī āp ko salām kahte haiñ. ²⁴ [Hamāre Kḥudāwand Īsā kā fazl āp sab ke sāth hotā rahe.]

Ākhirī Duā

²⁵ Allāh kī tamjīd ho, jo āp ko mazbūt karne par qādir hai, kyonki Īsā Masīh ke bāre meñ us

ḵhushḵhabrī se jo main sunātā hūn aur us bhed ke inkishāf se jo azal se poshīdā rahā wuh āp ko qāym rakh saktā hai. ²⁶ Ab is bhed kī haqīqat nabiyoñ ke sahīfoñ se zāhir kī gaī hai aur abadī Ḵhudā ke hukm par tamām qaumoñ ko mālūm ho gaī hai tāki sab īmān lā kar Allāh ke tābe ho jāēñ.

²⁷ Allāh kī tamjīd ho jo wāhid dānishmand hai. Usī kā Īsā Masih ke wasīle se abad tak jalāl hotā rahe! Āmīn.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30